


# AJA JUBA PA KALVALI

 Nakusachila, Mulongo Neville. [Mulongo Neville waamba mba, “Upeshiwe, mulongo!”—Waku.] Lesa akupeshe, Mulongo Neville. Nakusachila, bingi.

<sup>2</sup> Mwabuka byepi, balunda. Ke jishuko ja kwikala pano pa tabbanako jibiji, lukeelo luno, na kwingijila Nkambo, kupichila mu kusapwila Kyambo ne kulombelela bakolwa. Kabiji Amiwa nasata bingi pa jino juba.

<sup>3</sup> Kabiji Amiwa najinga wakumya bingi, byo Nakutwela mukachi. Mulongo umo waji kwiya ne kwaamba mba, “Amiwa kechi mbena kukeba kwikala nobe yewa wakalepu wabula kufikilamo wabukilwe.” Kyajinga Mulongo Wright. Amiwa na mulombelejile, kabiji ne Nkambo wamubuka kupwijijika. Kabiji aye waishile, kasa abena kujila, na kungimuna kuboko kwami, ne kwaamba mba—mba ubena kusaka kusachila Nkambo pa—pa kubukwa. Aye wakebelenga kubwela na kupana lusachilo. Byonse byapwa. Aye—aye ujitu bulongo bingi pa kino kimye. Twasata bingi palulwe lushimuno.

<sup>4</sup> Kabiji Charlie, anweba ne Mulongo Jeffries, inge musaka, iyai kuno mwikale pa bibye bipona kuno. Kabiji anweba twimutambulwila bingi, nanchi kechi mwafwainwa kwimana ne. Awa mulongo mukwabo kokwa, kabiji Mulongo Wood, iyaitu kuno. Anweba muji. . . Kuji bicheche, bifulo bimo pa mbechi, nanchi kechi mwakonsha kwimana ne. Amiwa naketekela, bifulo bimo kobiji kuno, kabiji, ee, mwafwainwa kwikala batambulwila bingi kwiya ne kwikala pa bibye bifulo.

<sup>5</sup> Tuji bingi na lusekelo pa. . . Naketekela kyaambiwe mba, kimye kimo, “Najinga na lusekelo byo bang’ambijile mba. . .” Lesa akupeshe, mulongo. [Mulongo waamba mba, “Kimye kyonse natemwa kwikala pepi na musapwishi.”—Waku.] Nakusachila. Nasata, nakusachila. “Amiwa najinga na lusekelo byo bang’ambijile mba, twayai tuye mu nzubo yakwa Nkambo.” Ajo jo jishuko ja Bwinakilishitu ne lusekelo, ja kuya mu nzubo yakwa Lesa.

<sup>6</sup> Pakutala konse konse, na kumona balunda bavula bingi batwela mukachi, lukeelo luno, Amiwa njibingi na lusekelo pa kikye. Amiwa njibingi na lusekelo pa kumona Mulongo ne Nyenga Dauch kuno, kufuma ku Ohio. Namona Mulongo ne Nyenga Armstrong kunyuma kokwa, kufuma kosekwa ku Ohio. Lesa emupeshe anweba bonse, ne anweba. Kabiji, oo, pakutala monse monse, wakonsha kumona bavula bingi, kyakonsha kwikala kyakosa bingi pakuuba mba utele mazhina abo bonse. Nyenga Hoover, tuji bingi nalusekelo pa kukumona watwela mukachi, lukeelo luno, kufuma ku Kentucky. Kabiji Charlie ne

Nellie, Mulongo Jeffries ne kisemi kyanji, kabiji ne bavulatu batwela, kufuma kusa ya muzhi.

<sup>7</sup> Nanchi twaketekela kimye kyawama bingi mwi Nkambo, lukeelo luno, twaketekela Lesa kwitukumanya mu jishinda jimo na kupesha myeo yetu kabiji ne kwingijila atweba bintu byo tubena kukabila.

<sup>8</sup> Kabiji byo Mbeni kumona mpuzha yonse, inge Nakonsha kuya balunda nami bonse baji muno, Nakonsha kusenda lukeelo lonse, na kwamba bapusanapusana. Kyandengela amiwa kumvwa bulongo pa kubwela jibiji ku kipwilo, ne kumona bantu bonse mukachi, ne kusambakana nabo.

<sup>9</sup> Kikekala byepi umvwe twafika Mwiulu, kabiji ne kukumana Kokwa mu kyokya kimye kya myaka ne myaka, mu lumvwang'ano lwabupopweshi bwa Peenape kasa tuji pamo, kasa twazhokoloka Njitanda jakwa Lesa, kabiji ne mapesho onse otwaumvwa bulongo? Atweba, Kokwa, tukalengwa mumwekelo Yanji, kabiji ne mukipasha Kyanji, kabiji ne Mupashi Wanji kasa aji pe atweba, na kumupowela ne kumwingijila Aye Peenape yense, kwakubula kukoka ne.

<sup>10</sup> Ingi langulukaitu, kechi kujipo kintu kimo kyo mwakonsha kulanguluka ne, akyo kyo mwatemwa kuuba, bino mukimye kimo pa kupitapo kimye mwikala ba kooka pa kwikyuba. Charlie, Naketekela mba obewa ne Amiwa twaya mu bubinda bwa baluyeye kukila pa kintu kiji kyonse kyo twatemwa kuuba, mujojo jishinda, bino, mwayukatu, twikala bakooka pa kwikyuba.

<sup>11</sup> Kabiji Amiwa—Amiwa natemwa ku—kukanjila, kuya mu mitumba na kukanjila. Bino Amiwa ngikala wakooka, bimye bimo, wakonsha kukeba kuuba kintu kingi.

<sup>12</sup> Kabiji Amiwa natemwa ku dulaivwa. Bimye bimo Amiwa ngumvwa nobe nakooka kabiji ne kupwamo, kabiji mishipeshipe ifikatu ne papelo. Amiwa twelatu mu motoka wami ne kuya naya, kabiji nakwachijila ne ku kindilaivo, kengye ne kuya pa mukwakwa, kasa nyimba, “Amiwa nasekela bingi Nakonsha kwamba mba Amiwa ne umo wamwiabo,” nangwa kintu kimo. Kasa nakwachijilatu aja jiwilo, kabiji kasa mbeni kwimba, ne kuzhisha kulu kwami, kabiji kasa mbijika. Kabiji, kyawama, pakupitapo kimye, Ng'umvwa ku kooka, kabiji pano Amiwa mbwela panzubo ne kutatula kintu kikwabo.

<sup>13</sup> Pakuuba umvwe twatatula kupopwela Lesa mu bobwa Bumfumu bwakatataka, kechi kukekalapo kimye kya kukooka ne, kikekala—kikekala kimye kyonse ke mapesho, kuyatu na kutwajijila. Bino, mambo, tukekala baalulwa pa kyokya kimye. Atweba kechi tukekala nobe byotuji pa kino kimye ne. Atweba tukekala bapusanako, bilengwa byapusanako kukila byo tuji pa kino kimye. Nanchi, twiiba lusekelo.

14 Amiwa na langulukilengatu. Amiwa kechi nayuka ne kana ne Kyubile, kwikyambula nangwa ine. Mulongo Charlie, kimye kimo kunyuma, Najinga kokwa ku Kentucky nanji, kabiji waambile mba, “Mulongo Branham, walanguluka mba, mu Myaka kiumbi kimo, obewa ne Amiwa tukaya na kwipaya baluyeye?”

Amiwa naambile mba, “Amiwa kechi nalanguluka byobyo ne, Charlie.”

15 Waambile mba, “Kyawama, twikitemenwe bingi,” waambile mba, “obewa—obewa walanguluka mba tukeyyuba inge twafika mu Myaka kiumbi kimo?”

Amiwa naambile mba, “Ine, kafwako kintu kimo kikepaiwa mu Myaka kiumbi kimo ne.”

Kabiji aye waambile mba, “Kyawama, twikitemenwe bingi.”

16 Amiwa naambile mba, “Charlie, pano ibyepi inge nakonsha kukushinawina mba kimye kimo wajinga ngulu, kabiji wasutwilwe mu bukilengwa kyapeulu, kwikala ke muntu? Wakonsha kutemwa kuya, kukeba kubwela na kumvwa bulongo byalusangajiko bya ngulu?”

Waambile mba, “Ine.”

17 Amiwa naambile mba, “Monai, wakonsha peulu peene kukila ngulu, pano, wii muntu, obewa kuuba watemwa kwikala ngulu ne jikwabo ne.” Amiwa naambile mba, “Pano mvuzha byobyo mu kipimo kya masauzande teeni, kabiji abyo byobyo ukekala umvwe wapipulwa kufuma mu uno musango ne kuya mu yewa ye ukekelamo. Obewa kechi ukakeba kwikala muntu jibiji ne.”

18 Abo ibyo. Kikekala ke kintu kyapusanako. Amiwa njibingi na lusekelo pa milanguluko ya kikye, kasa twayuka mba juba jimo tukakajila peulu pene.

19 Kyawama, pano, inge Nkambo waswa, Pamulungu ubena kwiya, ao ukekala nobe... Apo Amiwa kafumapo, kuya ku Wyoming, na mulunda wawama bingi; nangwa kuya mu Idaho, na mulunda nami wawama, Mulongo Miner Arganbright, Mulongo Clayt Sonmore, Bantu Basulu Babwinakilishitu.

20 Mulungu wiya, mulungu kufuma pa walondelapo, ke pano; wabu 7, Amiwa nkekala mu—mu Dallas, Texas, ku Mpwijilo ya Jiwi ja Lubuko. Kabiji bufuku bwami bwa kwamba ke bwabu 7. Kabiji popo Nkabwela, ne kuya ku Idaho na Mulongo Arganbright kabiji ne Bantu Basulu Babwinakilishitu. Kabiji kape kwikala na bufuku bumo ku Minneapolis, kasa tukyangye kuya ne. Kabiji pano ke kajo kakwiauula ka Bantu Basulu Babwinakilishitu.

21 Aye Nkambo inge waswa, Pamulungu wiya lukeelo Amiwa kakeba kubwela kuno jibiji pa tabbanako, kabiji umvwe kyaswishiwa kabiji kyaikala kyaswa aye Nkambo. Kabiji Amiwa

nkakeba kwamba pa mutwe wa *Ako Kazhimbiji Mu Mwela*, inge Nkambo waswa. Kyamweka nobe kiji pa muchima wami, mulungu yense.

<sup>22</sup> Kabiji lukeelo lumo, lwiine lukeelo kelo, pepi nobe foolo koloko mu kimye kya lukeelo, Nabukile kabiji Naikele na yuwe mulanguluko, “Aja juba pa Kalvali.” Kabiji Mbena kukeba kwamba pa kyokyo, lukeelo luno: *Aja Juba Pa Kalvali*.

<sup>23</sup> Kabiji pano pa kutanga, twayai tuzhikule pano mu ma Baibolo etu, mu Kilembelo, mu Mamboawama akwa Mateyo Wazhila, pa kyapitala kyabu 27. Kabiji ne kutatwila pa veleeshi wabu 27 ne kutanga kibaba kya kikye Kinembelo, pakuuba mba tumone pa kutatwila, nanchi ponkapo popo tusakutatwila. Kabiji pa kupwisha kusapwila, nanchi tusakwikala na kulombelela bakolwa.

<sup>24</sup> Kabiji, oo, kufuma kimye kyapeleleko kuno, ke kuletatu bya kunyuma, kabiji ne kutazha ku nyingijilo yami ipya. Najinga na lushimuno lwavula lwakubwela kufuma kuyoya mpwijiilo kukila byo Naikala nayo pa kimye kyabaya.

<sup>25</sup> Pajipo kintu kimo pa, kyakuuba mba wafwainwa kukwatakana na muntu, nangwatu kimweke byepi nobe kimwesho kyakilamo. Bino, monai, lubuko lwafwainwa kushakamina pa lwitabilo lwanji bunke. Pano, inge muntu bunke bwanji uji na lwitabilo . . .

<sup>26</sup> Kabiji bamona, nobe, Mupashi Wazhila uya pajibumba ne kwamba mba, “*Bintu-bintu* bimo byamwekele. Kabiji, akya, obewa wi *kananga-ne-kananga* pa jizhina. Kabiji obewa wafuma ku mpuzha *kanaga*. Kabiji *kintu* kimo kyo mwaua. Kabiji kikekala *mujiye* jishinda.” Kabiji mwamona byonsetu byamweka mu jonkaja jishinda!

<sup>27</sup> Nangwa byonkabyo, muntu bunke, waikala popa, wafwainwa kutala mwiulu ne kwamba mba, “Awa wafwainwa kwikala Lesa. Amiwa natambulwila lubuko lwami.”

<sup>28</sup> Pakuuba, mukifulo yakyokyo, bunke bwanji waamba mba, “Bikai maboko enu pe amiwa kabiji ne kundombelela, nanchi Amiwa nsakubukwa.” Bino ajo jo jishinda jotwafunjishiwamo muno mu America, kabiji, nanchi, kwitabila kyokyo. Kabiji akyo kine Kinembelo.

<sup>29</sup> Pakuuba pano twatana, mu Africa ne mu mampuzha apusanapusana, anweba lekaitu kintu kyayewa musango kyamweka, jibumba jonse jafikilatu pa kimye kimo, baswa lubuko lwabo, mambo kechi bafunjishiwapo kintu kiji kyonse ne. Mwamona? Abo kechi bafunjishiwa bya lubuko ne. Kabiji umvwe bamona kyokya, abo bayuka mba kuji Lesa uji na bumi. “Kabiji umvwe Aye uji nabumi, Aye—Aye ye wakila pa bintu byonse, kabiji Aye—Aye ubuka.” Kabiji byokiji, mambo pa kwingijila panengezhiwa kala, bitendekesho, amba Aye ye

ubuka, kabiji ubuka bantu. Nanchi ine bamona Kyeenyi Kyanji ke kingile mu Kipwilo Kyanji, nanchi baamba mba, “Akyo kyaikajika bintu byonse. Abyo byo byonka byotukeba.”

<sup>30</sup> Pakuuba twafunjishiwa mba, “kubika maboko pa bakolwa,” kabiji ne bintutu bya musango yewa. Ao oene mambo kyo kibujila kwingila bulongo mu America ne.

<sup>31</sup> Pano, vulukai, Pamulungu walondelapo lukeelo, inge Nkambo waswa, Mulongo Neville ukekibijika, nangwa byonkabyo. Kabiji . . . aye . . . *Ako Kazhimbiji Mu Mwela.*

<sup>32</sup> Pano, Nakwimupa kimye kicheche kya kuzhikula mu Binembelo byenu, ku Mateyo 27. Twayai tutatule kutanga pa—pa veeleshi wabu 27, wa Mamboawama akwa Mateyo Wazhila. Pano twayai tuteleke bulongo kutangilo.

*Ponkapo bashilikale ba mwine ndamakyalo bamutwajile Yesu mu kipango kya ndamakyalo, ne kubungizha ko aji bonse ba mujibumba ja bashilikale.*

*Kabiji bamuvujile bimvwalu byanji, ne kumumwika kivwalo kyachijisha.*

*Kabiji balukile munchinya wa miba, ne kumwika ku mutwe wanji, ne jitete mu kuboko . . . kanji: kabiji bamufukaminenga panshi, ne kumwendeleka, mba, Mutende, Mfumu wa Bayudeya!*

*Kabiji bamushipijile mate, ne jitete bamwangachilejo, ne kumupumajo ku mutwe.*

*. . . ne pakupwa kumwendeleka, bamuvujile kivwalo, ne kumuwika bamuvwikile birwalo byanji mwine, ke bamutwale ne kumutwala na kumupopa pa musalabo.*

*Kabiji byo bafuminemo, bamwene muntu mwina Kilene, jizhina janji Shimona: yebakakachizhe amba asende musalabo wanji.*

*Kabiji pakufika kuntu, bafikile kuntu ko batela mba Ngolongota, ko kuba mba, kuntu kwa kiboyongolo,*

*Bamupele binyu byamvwangakana na ndulu amba a tome: . . . kabiji pakutompapo, kechi waswile kutoma ne.*

*Kabiji byo bamupopele pamusalabu, ba abenye byakuwala byanji, kabiji batele bubale: pakuuba mba kifikizhiwe kyaambile ngauzhi, Beabenye byakuwala byanji, kabiji pa kyakuwala kyami popo batelejile bubale.*

*. . . ne kwikala baikele konka na kumutala;*

*Kabiji babikile . . . peulu ya mutwe wanji kya kumushinawina kyanembelwe mba, UNO YE YESU MFUMU WA BAYUDEYA.*

*Kepo kwajinga batupondo babiji bapopelwe nanji pa misalabu, umo ku kilujo, kabiji mukwabo kukipiko.*

*Kabiji abo—abo bapichilenga konka bamubilenga mwenga, kasa benauna ku mitwe yabo,*

*Ne kwaamba mba, Obewa onauna nzubo yazhila, ne kwiishimukulula mu moba asatu, ipulushe obewa mwine. Inge obewa wi Mwaana Lesa, ikila ku musalabu.*

*Byonkabyo ne bang'anga bakatampe bamwendelekelenga, ne banembeshi ne bakulumpe, amba,*

*Aye wapulwishenga bakwabo; aye mwine ne kwipulusha ne. Inge ye Mfumu wa Isalela, lekai ekile kumusalabu, kabiji atweba kusakumuketekela.*

*Aye waketekejile mwi Lesa; lekai amupulushe, inge wakonsha kumupulusha aye: mambo waambilenga mba, Amiwa ne Mwaana wakwa Lesa.*

*Batupondo nabo, bapopelwe nanji pa misalabu, nabo ke bamwendeleke, myendeleko.*

*Pa awala wabutanu na bumo kwakumbene mfishi kyaalo kyons kufikatu ne pa awala wabutanu na buna.*

*Kabiji pepi nobe awala wabutanu na buna Yesu wabijikile na jwi jikatampe, kwamba mba, Eli, Eli, lama sabakatani? kokuba mba, Lesa Wami, Lesa wami, kika kyo mwandekela?*

*Bamo baimene konka, byo baumwine byobyoyo, baambile mba, Awe muntu ubena kwita Elaija.*

*Kabiji ponkapotu umo...wa mwi abo waile lubilo, washikwile shipanja, ne kumuyuzha na binyu byasasa, ne kumusomeka ku jitete, ne kumupa amba afyompeko.*

*Kabiji bakwabo baambile mba, Kilekai, tumone kana Elaija usakwiya na kumupulusha.*

*Yesu, byo abijikile jibiji na jwi jikatampe, walekele ku mweo.*

*Kabiji, talai, kipembe kya munzubo yazhila kyatabukile ke bibiji kufuma peulu kufika ne panshi; ne mushiji watenkene, ne mabwe nao alajikile;*

*...ne bilende byalajikile; ne mibiji yavula ya bazhijikwa aba baponejile kala mu tulo yasangwilwe,*

*Kabiji ke balupuke ne mubilende panyuma yakusanguka kwanji, kabiji bakatwelele mu muzhi wazhila, ne kumweka ku bantu bavula.*

*Kabiji mukulumpe wabashilikale, ne abo bo ajinga nabo, na kumutala Yesu, byo bamwene kitentanshi, kabiji ne byonse bya bintu byaubiwe, ke moyo*

*mukatampe, amba, Kine awe wajinga Mwaana wakwa Lesa.*

<sup>33</sup> Twayai tukunyike mitwe yetu pa kakimye kacheche tulombe.

<sup>34</sup> Nkambo, twayuka mba Anweba mwi Lesa. Kabiji kiji... Panyuma ya kutanga kikye Kyambo kyazhijikwa ne kuzhila, twatwajijila na kumona mba musango Wenu kechi wakingya ne. Anweba kimye kyonse mwi Lesa. Kabiji kyamwekele nobe Yesu kechi wakonsha kutambula bukwasho buji bonse ne, kyakuuba mba Aye wakwachilwe ku maboko abubi kabiji bamuchibawile mu bipivwa, kabiji ne kushipilwa mate, ne kumwendeleka, kabiji ne kumukobeka pa musalabu, na kusumisha mashi, kasa abena kufwa. Kabiji kyamwekele nobe kechi kujipo bukwasho, nangwa kumone, poso ne byo Ajijile, Ayemwine, "Lesa Wami, Lesa Wami, kika Anweba kyo mwandekela Amiwa?"

<sup>35</sup> Bino, Anweba mwingila pa kimye bintu byonse po byakonsha kubula kwingila. Twapewa kuyuka, Nkambo, amba inge kuji mikola yo twakonsha kubula kwabuka, inge tuji na mitumba yo twakonsha kubula kutuntuka, Lesa wingijila pa bintu abyo bakwabo byo bakonsha kubula kuuba.

<sup>36</sup> Anweba mwi basendwe, pa mwingilo, mambo Anweba mwayukile eene mambo ajoja juba pa Kalvali. Anweba, byomuji Lesa, Umo ubula kupela, mwayukile kikye kimye amba kyakonsha kwikalako. Pakuuba byo kyafikizhiwe, apo Anweba mwamwesheshe amba Anweba mwi Lesa. Anweba mwamwesheshe Ng'anyi ujipo na butangi. Anweba mwasukenye ntanda, kabiji ne bazhijikwa balajile mu mushiji balupukilemo. Anweba muleta mfishi mu kikye kya bufuku, nobe mfishi mu bufuku, kumwesa amba Anweba mwi Lesa. Bino Anweba mwamwekele kwikala bazhindamapa pa kimye kyalepa.

<sup>37</sup> Twayai, kufuma mu kikye, mufumyemo mfukwilo, amba, kikulutu tubena kwenda mu Mupashi, ne kutangijilwa na kuboko kwakwa Lesa, nangwa bimo bimweka nobe byatama byepi, nagwa byonkabyo yubena kotalang'ana na Kalvali; Lesa ukamba mu kimye kyaitabilwa, pa kimye kya itabizhiwa.

<sup>38</sup> Pano, Lesa Taata, twalomba kulekelwa kwa mambo etu ne mizhilulwila yetu. Twaipuzha Mupashi Wenu kwi tutangijila. Tutangijilai, byonka Nkunda byo atangijila Mwanamukoko. Lekai twikale balukokelo ku kyonse kyakonsha kwi tuponena, kasa twayuka kikye, amba Lesa wingila bintu byonse bulongo, kabiji ne kuyuka mba bikekalatu bulongo.

<sup>39</sup> Ikalai ne atweba leelo mu ino mpwijilo. Twalomba mba Anweba musa kupulusha abo bonse baji mu musango wakupuluka, kabiji babena kukeba lupulukilo. Yuzhai bonse baji na Bumi Bwape, abo babena kukeba kyokyo. Twalomba mba Anweba musa kubuka bonse bakolwa ne kumanyikwa, abo baiya, kasa babena kukeba lubuko. Kabiji twatakaika Anweba

pa kikyē. Twikipuzha mu Jizhina ja Mwaana Wenu, Mupulushi wetu, Yesu Kilishitu. Amena.

<sup>40</sup> Bino, pakwamba lukeelo luno, twasaka kukebula milanguluko yenu ku mutwe Ye nasala kwambapo: *Aja Juba Pa Kalvali*.

<sup>41</sup> Kyamweka nobe kechi kyafikilamo pa kino kimye ne; akye kyafwainwa kwikalako Pakitanu Kyawama. Kalvali wafwainwaa kuvulukwa pajuba pajuba. Kabiji twaumvwa byavula bingi pa kikyē, twatanga byavula bingi pa kikyē. Basapwishi basapwila pa kikyē, kufumatu kutendelekele ya kimye. Banyimbi baimba pa kikyē, kupita mu mankulo. Bangauzhi baambijile jimo pa kikyē, myaka foolo sauzande kasa kikyangye kumweka. Kabiji bangauzhi baluno batongola kunyuma mu kimye po kyamwekele. Ke juba ja neema bingi! Ke jimo juba janeema bingi pa moba onse ao Lesa o apaine panontanda.

<sup>42</sup> Kabiji inge waneema bingi ku mutundu wa muntu, Kalvali, Nalanguluka mba kituwamina bingi atweba kubwela kunyuma ne kwikipalanguzha, kumona byo kyalumbulula kwi atweba. Mambo, Amiwa kine, pa kino kimye kyapwa kyo tubena kwikalamo, tubena kukeba muneema uji yense wakwa Lesa ye twafwainwa kuyuka. Kabiji ne byonse byo twakonsha kutaana, tuji pano na kufundapo pe akyo, na kumona kana kyo kika kwi atweba, kabiji ne byobya Lesa byo etubila, kabiji ne kumona byobya Aye byo alaile kwituubila atweba. Kabiji akyo kyotwishila ku kipwilo. Oeene mambo musapwishi kyo asapwila, ao oeene mambo kyoatangila ne kulanguluka languluka mu Kinembelo, ne kukeba lutundaiko, ke mambo a kuuba mba aye ke kalume wa bantu bakwa Lesa. Kabiji aye ubena kukeba kintu kimo kyo akonsha... akyo Lesa kyo akonsha kwamba ku bantu Banji, kintu kimo kyoakonsha kwibakwasha. Kapepo, kyakonsha kwikala, kibazhachisha mu bubi bwabo, bino kyakonsha kwikala ke kyabukwasho kwi abo pa kwi bemanya, amba baleke bubi bwabo kabiji ne kwimana amba bengijile Nkambo. Kabiji bamwingilo wafwainwa kukeba bibye bintu.

<sup>43</sup> Kabiji jino juba, byo jiji janeema bingi, juba jimo jikatampe bingi ja mu moba, twayai tumone pa bintu bisatu aja juba byo jalumbulula kwi atweba. Twakonsha kutola maaduleendi. Bino, lukeelo luno, Amiwa nasalululatu bintu bisatu byapusana, biine bikatampe byo twakeba mba tumonepo, mu bimye bicheche bibena kwiya kulutwe, byo kyalumbulula Kalvali kwi atweba. Kabiji Amiwa nalomba mba abyoya bisa kuzhachisha yense mubi uji muno; kisa kulengela yense wazhijikwa kuya pa manungo anji; akyo kisa kulengela yense muntu wakolwa kwimana na lwitabilo kwi Lesa, ne kuya, wabukwa; yense mubi, ke wapuluka; yense wabwela panyuma, wakonsha kwi umvwina



buvu aye mwine; kabiji yense wazhijikwa, asangalale, kabiji ne kukwata kipya kipya kabiji ne luketekelo lupya.

<sup>44</sup> Kintu kimo kikatampe, kintu kyaneema kyalumbulula Kalvali kwi atweba ne ku ntanda, ke kino, wapwishishe jipuzho ja bubi, jimotu kikupu. Muntu watainwe wazhatwa na bubi. Kabiji bubi bwajinga na kuzhatwa kwa kuuba mba muntu kechi wakonsha kulipila ne. Akwa kuzhatwa kwajinga kutampe bingi poso kechi kwajingapo umo wakonsha kulipila ku kokwa kuzhatwa ne. Amiwa kine naketekela mba Lesa wikilengele mu yekawa musango, kyakuuba mba akwa kuzhatwa kwafwainwa kwikala kukatampe bingi kyakuuba mba muntu kechi wakonsha kulipila ne, nanchi Aye wakonsheshe kwi kyuuba, Aye mwine. Pano, kuzhatwa kwa bubi kwajinga ke lufu. Kabiji atweba bonse twasemekejilwe mu bubi, kwimitwa mu bubi, kwiya pa ntanda, kasa twamba bubela. Onkao mambo kechi kwajingapo umo wa mwi atweba wafikilamo, nangwa, kechi bakonsha kutana umo pantanda ao wafikilamo ne.

<sup>45</sup> Kabiji bubi kechi bwatapijile pantanda ne. Bubi bwatapijile Mwiulu. Luci- . . . wajinga . . . Lucifer, diabola, wajinga kilengwa kyazhatwa, pa mambo anji amizhilulwila, kasa akyangye kwiya pano pantanda. Bubi bwatapijile mu Mwiulu, amo Lesa mo abikile Bamalaika, kabiji ne bikwabotu, mu musango umo yenka Ye abikijilemo bantu; maana, kinchi kya maana, kinchi kya Bumi ne kinchi kya maana, apo muntu po akonsha kusalapo kyo asaka mwine. Kabiji Lucifer wapeewe nsambu, ya kusalulula kyo asaka, aye wakebelenga kintu kyawama kyakila kiji na Lesa. Apo po patatwijile lukatazho.

<sup>46</sup> Kabiji kwajinga nkebelo ya bubi. Awa nkebelo yajinga ke lufu. Lufu lo lwajinga malipilo. Kabiji, ko kuuba mba, twakonsha kuya mu kuzhika kwakikyeye, mambo Amiwa kechi naketekela mba kuji lukwabo ne kanatu lufu lumo. Kujitu Bumi bumo. Kabiji Amiwa naketekela mba muntu uji na Bumi Bwapeenape kechi wakonsha kufwa ne. Kabiji Naketekela mba kuji konaunwa kwapwijijika kwa yewa mweo uba bubi, mambo Baibolo waamba mba, “Awa mweo ulenga mambo, kine ukafwa.” Kechi muntu ne; “awa *mweo* ulenga mambo.” Nanchi, Satana kine wafwainwa kufwa, konaunwatu nshata. Byo Nakana kuswang’ana na baketekela mba Satana ukapuluka! Aye walengele mambo, kabiji aye yo tatwilo ya bubi. Kabiji mweo wanji walengele mambo; kabiji wajinga mupashi. Awa mupashi ukonaunwatu mpelu, kuuba mba kafwako kyakonsha kushalako ne.

<sup>47</sup> Kabiji bubi byo bwaishile pa ntanda, kunyuma akwa kuntendekelero, nobe kintu kifita kyapona kufuma mwiulu, kine kyasukenye ntanda. Kyataile kilengwa kyonse, pano pantanda, kabiji ne byonse bilengwa byakwa Lesa, mu buzha. Muntu wajinga mu buzha bwa lufu, misongo, makatazho, bulanda. Byonse bilengwa na lesa byaponene pamo nanji. Bubi

bwajinga kintu kikanya kuyuka akyo kine kyaonawine ntanda. Kabiji twabikilwe pano, babula bukwasho, mambo kilengwa kyonse pantanda kyakwachilwe ku kikye. Kabiji muntu yense wasemekelwe pano pantanda wakwachilwe ku kikye.

<sup>48</sup> Nanchi, kyafumine kutu kumo ku Mpuzha kwabula bubu. Kechi kyafumine pantanda ne. Umo mwi atweba kechi wakonsheshe kukula mukwabo ne. Kyajinga kya kufuma ku Ungi.

<sup>49</sup> Onkao mambo, muntu byo ayukile mba wafuma kwi Lesa wangi, waikela ke kang'enda. Abo bajijile. Abo bajijile. Abo bamanamine. Abo bapitang'enengatu, kupita mu mitumba ne mubiselwa, na kukeba Muzhi ao tungi ne mulenga ke Lesa. Mambo, aye wayukile mba inge wakonsha kubwela jibiji mu Kyeenyi kya Lesa, wakonsha kwi samba Nanji ne kupwisha. Bino kechi kwajingapo jishinda ja kubwelelamo ne. Aye walubijilemo. Aye kechi wayukile jishinda jakuyamo ne, nanchi watatwilekotu kuya, na kupitang'ana, kweseka kukeba kuntu kuno ko akonsha kumwena mwakubwelela ku yoya Mpuzha. Kintu kimo mukachi kanji kya mubujilenga amba wafuma ku—ku Mpuzha yalumbuluka. Kechi kujipo muntu umo muno mu jibumba jibena kumweka, lukeelo luno, nangwa mu jibumba ja patepu, ko ikaya mwapela ino ntanda, kechi kujipo nangwa umo pano ne, nangwa kuji konse ne, kana bakeba akwa kulumbuluka.

<sup>50</sup> Anweba umvwe mwalipila kongole, mulanguluka mba, "Akya kikebipwisha." Inge mwalipila makongole enu, nanchi kwaikala muntu umo wakolwa mu kisémi kyenu. Umvwe misongo yaikala bulongo, nishi popo muji na malipilo avula akalipila. Kintu kitanshi kyo mwayuka, suki yenu ke yaluluke yatokoloka, kabiji ke mukebe kubwela ku bwanyike jibiji. Kabiji kimye kyonse kujipo kintu kimo, na kutwajijilatatu, kabiji na mambo a yewa musango wa bubu. Bino mu muchima wenu, mambo mubena kukeba kyokyo, kimweshwa mba kuji Kulumbuluka kutu kumo. Kutu kumo, kujipo kintu kimo.

<sup>51</sup> Ao oene mambo, bimye byavula, leelo, awa ndengamambo ukijitu wakupitang'ana. Walamba, songwakazhi mwanyike wakonsha kuchiba miyumbwe ya suki yanji, pakuuba mba ekale wayukanyikwa; kupeta kilungi kyanji, pakuuba mba amweke walamba; kumwala bya kuvwala bya kumweshwa musango ye ajimo. Mambo, kyo kyonka kintu kyo akonsha kutana, kutana kintu kimo kyakweseka ku mubwezha mu bumuntu bwangi, inge wakonsha kulengela banabalume kwita tuswelele kwi aye, ne ku musokona, ne kongoloka nanji. Mwanamulume wakyanyike naye wakonsha kuuba kintu kimo ku songwakazhi, ne kweseka kumweka waitabilwa ku mwanamukazhi. Botwaikala nabo bakanshimika nzubo, ne kwiubila mujishinda japusanako, mambo imwekako bulongo pacheche kukila mpuzha ya bo balamakana nabo.

Ke kimyetu kyonse, tubena kukebapo kintu kimo, kabiji kintu kimo kitwajijilatu na kuya palutwe pakyo pacheche. Inetu wa kyanyike ukatana mukwabo inetu wa kyanyike wayukanyikwa bingi kukila byo aji. Ye balamakana naji ukatana nzubo imweka bulongo kukila yanji. Mwanamukazhi ukatana mwanamukazhi mukwabo wamvwala mujishinda japusanako, jimweka bulongo kukila byo amvwala.

<sup>52</sup> Ke kintu kiji mwi atweba, akyo kibena kukebapo kintu kimo, kabiji kimwasha mba twalubilamo. Tubena kukeba kyokya kintu kimo kiketuletela kwikala batondwa, akyo kikayuzha aya mpuzha ya zala momwa mukachi, bino kibena kumweka nobe kechi twakonsha kwikitana ne. Bantu bekyeseka kupita mu mankulo. Be kijijilenga. Ba jijile. Baubile kiji kyonse kyo bayuka kuuba, bino kechi bekitaine ne, ke kupitang'anatu mwaya ntanda.

<sup>53</sup> Pa kupezhako, juba jimo, ajo kejoja, juba ja pa Kalvali, kuji Umo waishile kufuma ku Lukumo. Umo, wa Jizhina ja Yesu Kilishitu, Mwaana wakwa Lesa, Ao waishile kufuma ku Lukumo, kabiji ne Kalvali walengelwe. Aja jajinga juba mfuto ya mambo po yalipijilwe, kabiji ne jimpuzho ja bundengamambo japwile myaka ne myaka. Kabiji kyashikwile jishinda jakuya kukikye kintu kyo tubena kumvwa nzala ne kufwa kilaka. Kyaletete mpuzha ya kwikala batondwa. Kechi kujipo muntu ao wapepwilepo Kalvali, kabiji ne kwikimona mujishinda mo kyaikejilemo, ao wakonsha kwikalatu mu musango umo ne. Bintu byonse byo akebanga ne kukabila, wibikumanya, umvwe wafikatu pa kyokya kifulo.

<sup>54</sup> Jajinga juba janeema bingi, kabiji akyo ke kintu kyaneema bingi, kyasukenye ntanda. Kyasukenye ntanda, mo kyabujila kusukenapo kunyuma. Kimye Yesu kyo afwile pa Kalvali kabiji walipijile jimpuzho ja bundengamambo, ino ntanda ya bundengamambo yajinga mu mfishi. Juba jazhikile pakachi ka juba, jajinga na lubazhibazhi lwa kuchina. Kabiji ne mabwe asukene, mitumba yalajikile, kabiji ne mibiji ya bafwa yabukile kufuma mu kilende.

<sup>55</sup> Pano kyaubile byepi? Lesa wabweleletu paziilo, pa Kalvali. Aye wamufupile awa nyama, watelwa mba Satana, myaka ne myaka. Pano aye wanshita bingi kufumatu pakyokya kimye, mambo kyaletete Kyeya ku mutundu wa muntu. Kabiji yensetu wayuka mba nyama ye bakozha wikala bingi wanshita, kasa abena kukalaba na musana wamokoka. Pano, Satana washijilwe, pa Kalvali. Ntanda yashiniikishe mba byo kiji.

<sup>56</sup> Mutengo mukatampe bingi ao walipijilwe, kabiji ye Yenkatu wakonsha ku mulipila, waishile na kwikyuba pa Kalvali. Apa ipo mutengo mukatampe po alipijilwe. Akyo kyo kintu kimo. Lesa wikikebele. Kafwako muntu wafikijilemo ne. Kafwako muntu wakonsheshe ne. Kafwako muntu wakonsha kwikyuba

ne. Kabiji Lesa waishile, Aye mwine, kabiji waalwilwe ke muntu, ne kwikala bumi bwa bumuntu, na kukabila kwa bumuntu, kabiji wapopelwe pa Kalvali. Kabiji konka kwa, kimye Satana kyo Alangulukile mba wakonsha kwikyuba, Aye wakakelwe kupitamo, Aye waile na kupita mu Gesemani kabiji ne kwesekwa konse kwapichilemo muntu. Aye wapichilemo nobe bantu bonse, bino walipijile mutengo.

<sup>57</sup> Kabiji akya ikyo kyalengejile mfishi pa ntanda. Wajinga nobe muchi ukanya kumvwa misongo, wakwingijisha pa kutumbula. Inge dokotala wapana ku muntu muchi ukanya kumvwa misongo, patanshi umupwishamo bumuntu, kasa akyangye kwi kyuba. Kabiji kimye Lesa kyo apaine akwa—akwa kutumbula kwa Kipwilo, ntanda iji na muchi ukanya misongo, bilengwa na lesa byafwilenga musavu. Kechi kyakukumya ne! Lesa, mu mubiji wa bumuntu, wafwilenga. Kyajinga kimye akyo ntanda kyo yapembejilenga, nangwa byonkabyo bavula kechi bekiyukile ne.

<sup>58</sup> Nobo byokiji leelo, bavula bakebelenga bibye bintu, kabiji nangwa byonkabyo kechi bebiyukile ne. Abo kechi bayuka jishinda ja kulupukilamo ne. Abo bakiji babena kukeba bya kisangajimbwe ne bintu bya mu ntanda, kweseka kumona jishinda ja kulupukilamo.

<sup>59</sup> Kwajinga, biyukilo byavula bingi byatongwelenga ku joja juba, byavula bivule bikatampe. Kyajinga kivule kya mwanamukoko, kya ng'ombe mulume, kya katela, kabiji ne byonse bye bintu, bino nangwa byonkabyo kechi bekyonawine ne. Kechi kyakanyinye kya kwachile lufu ne, ako Satana ko ajinga na ntanda.

<sup>60</sup> Aa onka mabwe po a endanga kunyuma, peulu-ne-panshi pa ntanda, bibena kutema bibili bya mujilo! Lucifer wajinga mwaana wa lukeelo, kabiji waendelenga pa ntanda kasa pabena kutema mujilo. Aa onka mabwe amo alekele kutema, kimye Yesu kyo afwile pa Kalvali, alupwilenga lubebe lwa mujilo kufuma mu ntanda.

<sup>61</sup> Mutengo awa walipijilwe, ne buzha bwakwa Satana bwa onaikile. Lesa wabwezhezhe mu maboko amuntu, jishinda ja kubwelelamo jo akebelenga. Aye kechi watwajijile na kujila ne. Mpuu, Aye byo amokwele musana wakwa Satana, apa pa Kalvali, musana wa bundengamambo, wa misongo! Kabiji kyaleta mumi yense, pano pantanda, kubwela mu Kyeenyi kya kwa Lesa, na bundengamambo bwalekelwa. Aleluya! Bundengamambo bwetu bwalekelwa. Satana kechi wakonsha kutwajijila na kubika mfishi pakachi ketu ne Lesa ne.

<sup>62</sup> Kuji jishinda jikatampe jalengwa. Kuji telefoni waikala kokwa. Kuji jishinda ja kuya ku Lukumo, kileta muntu yense kufika mu joja jishinda. Inge muntu wayulwa na bubu, kya munungakanya pakachi. Aye wakonsha kulekelwa abwa bubu.

Kechi ponkapotu ne, bino abwa bubi bwalipililwa. Oo! Anweba kuuba mwaamba mba, “Amiwa kechi nafikilamo ne.” Kine, anweba kechi mwafwainwa ne, anweba kechi mwakonsha kufikilamo ne. Pakuuba Umo wafikilamo wasendele kifulo kyenu. Anweba mwakasuluka. Anweba kechi mwafwainwa kutwajijila nakupitang’ana ne. Anweba kechi mwafwainwa kwikala muntu ukeba-kisangajimbwe pano pantanda ne.

Mambo kuji nsulo ya yula na Mashi,  
Afuma mu mishipeshipe yakwa Emanuele,  
Amo babi bakowamo,  
Bundengamambo bwabo bonse bupwa.

<sup>63</sup> Anweba kechi mwakosha kulubilamo ne. Kuji jishinda jikatampe, kabiji Jishinda, kabiji jatelwa mba Jishinda ja buzhile. Babi kechi bapitamo ne. Mambo, aye wafuma ku nsulo, patanshitu, kabiji apa bino watwela mu jishinda jikatampe.

<sup>64</sup> Aye wachimwine bulume bwakwa Satana. Aye washikwile bizhilo bya tuleya twa ngehena, ku muntu yuji yense ao washikijilwe, pano pantanda, mu tuleya, kuchima kuuba mba byo afwile, lufu lwakonsha kwikala ke kika kwi aye. Pa Kalvali, Aye washikwile bizhilo bya biteete, lekai yense wakaswa akasuluke. Anweba pano kechi mwakonsha kutwajijila na kubwezhiwa panshi ku bubi ne. Anweba kechi mwakonsha kutwajijila na kupana bya mibiji yenu ku bubi ne, kutoma, kupepa, kuta ngyuka, kwamba bubela. Anweba nwafwainwa kwikala ba bukishika, waoloka, kabiji wa lumbuluka. Kabiji Satana kapaji kyo akonsha kuuba pa kikye ne, mambo anweba mwakwachijila jishinda, jishinda-Jabumi ajo jaikala pa Jibwe ja Myaka yonse. Kafwako nangwa kimo kyakonsha kwimufumyapo pa Kikye ne. Kafwako nangwa lubesha wakonsha kwi musukanya kufuma pa Kikye ne. Kafwako nangwa kimo ne, nangwatu lufu alo lwine, kechi lwakonsha kwitwabanya na butemwe bwa kwa Lesa abo buji mwi Yesu Kilishitu ne. Abyo byo byalumbulula Kalvali.

<sup>65</sup> Bantu bajinga mu buzha bakasulwilwe. Bantu bajinga kimye kimo na moyo wa lufu kechi bakonsha kutwajijila kwikala na moyo wa lufu ne. Muntu ukeba awa Muzhi, ao tungi ne mulenga, Lesa, aye wakonsha kusolomoka mu jishinda jikatampe, ne kutala kilungi kyanji Kwiulu, mambo aye wakasuluka. Aleluya! Aye wakulwa. Aye kechi ukabilwa kutwajijila na kwendauka ne, mambo kuji jishinda ja kuyukilamo kana uji bulongo nangwa ine. Lesa witupa Bumi. Bubi bwetu bwaya. Aja juba pa Kalvali ja lipijile mutengo. Inge twamona byonse bya, kechi kyakukumya ne usapaula kyo anembejile mba:

Pakachi kakupana mabwe ne jiulu jafita  
Mupulushi Wami wakunyikile mutwe Wanji ne  
kufwa wafwile.

Kipembe kyashikukile kyasolwele Jishinda  
Ja lusekelo lwa Mwiulu ne juba jibula kupwa.

<sup>66</sup> Abulahama kechi watwajijile na kwendauka ne, mwaya ntanda, na kukeba muzhi. Ndengamambo kechi wafwainwa kutwajijila na kwendauka ne, nagwa wakonsha kupuluka nangwa ine. Muntu wakolwa kechi wakonsha kutwajijila na kwendauka ne nagwa wakonsha kubukwa nangwa ine. Akya kipembe kyashikukile, pa joja juba pa Kalvali, kyasolwele Jishinda jakuya ku lushijilo lwapwijijika. Lesa tupai ngovu ya Mupashi Wanji, pakuuba mba twikale bakushinda mu bintu byonse; kitwipuzha atweba kwikala ba kwi kiketekela. Akyo kyamwekele pa joja juba pa Kalvali. Kechi kwajingapo juba jiji nobe joja ne. Kechi kukekalapo jimo jiji nobe ajo ne. Kechi ki kikebewatu ne. Mutengo walipilwa, kabiji twakulwa. Lusachilo lwikale kwi Lesa! Atweba twakulwa. Kechi kuji kutwajijila na kukumya ne. Kechi ku kiji kufwanyikizha pa kikyene. Kyonse kyasendelwe. Akya kipembe kyamvwetwile kibamba, kabiji atweba twaikala mu jishinda jikatampe, kechi kutwajijila na kukumya ne, kana kwitabila ne kwendatu kuya kulutwe. Atweba twenda kuya monka mu Kyeenyi kyakwa Lesa.

<sup>67</sup> Abulahama wayukile, kabiji ne bakwabo bayukile, amba mu kimye kyo babena kukeba Muzhi, bayukile mba bafuma Kuntu kungi. Kintu kimo kyamwekele. Baikelenga mu ntanda yaluwakana. Bitentashi byaishile. Bikukwila byaishile. Makondo ne kwipayang'ana! Misuka ne mwanamukoko umo ke kuja mukwabo, nangwa musuka ke kuja mwanamukoko, kabiji bonkwe ke kuja ng'ombe. Kechi kimweka bulongo ne. Pajipo kintu kimo kyatama. Aye wayukile mba kujipo kintu kimo kyatama. Bantu kabiji mulongo waipaya mulongo; taata waipaya mwaana, mwaana waipaya taata. Pajipo kintu kimo kyatama. Aye ubena kukota. Aye ubena kufwa. Aye ubena kuya na kupumba. Misongo iji pe aye. Aye uji mubuzha. Binchi bikoma, bino kechi bibula kufwa ne. Abyo bifwa. Mitumba yaluka. Tulunga twameema tuuma. Meema akakalwa. Pajipo kintu kimo kyatama. Kabiji aye wakebelenga mpuzha, Muzhi amo abye mobibula kumweka. Aye wayukile mba, inge wakonsha kubwela mu Kyeenyi kya Umo awa wibilengele kwikala bulongo, aye wakonsha kwisamba Nanji.

<sup>68</sup> Oo, jishuko jiji byo byo, ndengamambo, byo kiji, lukeelo luno, ja kuyuka mba pano uji Najishinda. Aja juba pa Kalvali jashikwile jishinda. Mambo aba bonse bashakulu jo bakebelenga ne kukebesha, Kalvali wi jipaine kwi obewa, kyatuntu. Wakonsha kwi jikana byepi? Wakonsha kwi jikana byepi, ne kutwela mu dinominesheni? Wakonsha kwi jikana byepi, kupingakenyamo kintu kingi, bya kisangajimbwe bya ntanda? Kika kyo wakonsha kubwela kwi jitambula? Kushinkulwa kwa kipembe kwabwezha muntu monka mu Kyeenyi kya Lesa, kwakubwela bubu pe aye, bwa musango uji yense ne. Kabiji

kwabika jishinda kumeso obe, ku kintu obe kyo ubena kukeba: Mwiulu, lukumo, mutende, Bumi Bwapeenape, byonsetu biji pe aye.

<sup>69</sup> Aja juba jajinga ja—ja konauna bulume bwa lufu bwakwa Satana. Popapwijile bintu byonse.

<sup>70</sup> Kabiji Amiwa mbena ku mumona Aye popa; Aye wajinga mwanamukoko wa mu Edena, kufumatu ku kivule kitanshi kyafuminemo.

<sup>71</sup> Kimye Abela, konka ku lwitabilo, walambwile kwi Lesa kitapisho kyakila kuwama kukila kyakwa Kaina, aye wafwaijilwe kukasa ki—ki pangwa kya magelepu mushingo yakwa mwanamukoko, ne kumukokela ku jibwe. Watolele aja—aja jibwe mu kuboko kwanji, ja ku muchibilako, kabiji wakokele kunyuma mutwe wanji wa mucheche, ne kumuteeta kabiji wamuteetele poso byo afwile. Kabiji boya bwanji bwazobele na mashi anji mwine. Aye waalang'ene mu mashi anji mwine. Kyajinga kivule.

<sup>72</sup> Bino pa joja juba pa Kalvali, kechi pajingapo mwanamukoko wa ino ntanda ne, pakuuba wajinga Mwanamukoko wakwa Lesa, awa wafwilenga, kasa alang'ana mu Mashi Anji Mwine. Aye bamuteetele, ne kumuchiba, kabiji ne kumupuma, kabiji ne kumushipila mate, ne kumunyakula, ne kumwimba lupi, kabiji ne bintu byonse, ku ntanda, kabiji ne Mashi ke anoke kufuma mu suki Yanji.

<sup>73</sup> Kimye mwanamukoko wakwa Abela byo afwile, wafwile, ke ambe mulaka ao Abela ye abujile kuyuka. Aye wasunyaukilenga.

<sup>74</sup> Kabiji kimye Mwanamukoko wa Lesa byo afwile pa joja juba pa Kalvali, Aye waambile mu mulaka ao kafwako nangwa umo wamuvwine Aye ne. “Lesu Wami, Lesu Wami, kika kyo Mwandekela Amiwa?” Wajinga Mwanamukoko wa Lesa, ye bachibawile bipimvwa bipimvwa, ku muteetaula.

<sup>75</sup> Aye wajinga yenkawa Mwanamukoko wajinga ne Abela mu milanguluko, byo amwene Lukunwa walailwe wa mwanamukazhi. Aye wajinga awa Mwanamukoko Danyela ye amwene, awa ye bachibile kufuma ku mutumba, kwakubula maboko. Aye wajinga Jiwilo mukachi ka jiwilo, jakwa ngauzhi. Byonse byo bamwene byafikizhiwe pa joja juba, aja juba pa Kalvali. Akya kyaletete kutwezhamo kintu kikatampe. Akya kyachimwine musana wakwa Satana.

<sup>76</sup> Kitanshi, twafwainwa kukeba kyalumbulwile aja juba. Kabubiji, twakonsha kumona aja juba kyo jauba kwi atweba, pano, byo jaubile kwi atweba. Pano, kyabusatu, twayai tumone kyo twafwainwa kubila aja juba. Kika kyo twafwainwa kuuba?

<sup>77</sup> Kitanshi, twakonsha kumona mu kyokyo, mambo jajinga juba jikatampe, jakila kubaya pa moba onse. Mutengo wa bundengamambo wapwile. Satana bulume bwanji bwachibikile.

<sup>78</sup> Kabiji pano twasaka kumona byo twafwainwa kuuba kubwezhwa pa byobya. Pano, mu kubwezhwa, Yesu byo afwile pa Kalvali, pa Kalvali aja juba, Aye kechi walipijiletu mutengo wa bubi bwetu ne, bino Aye nanji walipijile mutengo ne kulenga jishinda ja kuuba mba twafwainwa kumulondela Aye; mambo atweba, nobe ba Adama bapona aba bakulwa. Byonka Mupashi byo atangijilenga Adama (Adama mutanshi) kupichila mu Mupashi, awa wajinga na luusa pa bilengwa na lesa, nanchi atweba (ba Adama bakibiji), nangwa bantu ba pano pantanda bakulwa kwi Kilishitu, kufuma ku juba ja pa Kalvali, bakonsha kumulondela Aye. Pano, Aye byo afwile pa Kalvali, Aye walengele jishinda. Aye walekele ku Mupashi, ate Mupashi Wazhila, ne kumutuma Aye kubwela pantanda, kwi obewa ne kwi Amiwa kuuba mba twikale nanji. Akyo kyo kyalumbulula Kalvali kwi atweba, kuba mba tumulondele Aye.

<sup>79</sup> Kitanshi, talai mu kyokyo, monai byo kitubijile atweba. Kabiji pano twafwainwa kuuba byepi kutazha kukikye? Twafwainwa kuuba byepi obewa ne Amiwa?

<sup>80</sup> Pano, twaamba mba, “Kyawama, Amiwa—Amiwa nasata pakyokyo. Akya kyawama bingi.” Bino twafwainwa kwikiswa. Kabiji pa kwikiswa, ke kuswa Bumuntu Bwanji, Kilishitu mu michima yetu.

<sup>81</sup> Nachi, atweba twakasuluka ku bubi, onkao mambo kechi kujipo fungwa ya bubi yakobama pe atweba ne, nangwa pachechetu ne. Lesa, kijitu pamo nobe kechi twalengapo mambo ne, Kitapisho kyalumbuluka kitulengele atweba kwikala balumbuluka. Mambo, Yesu waambile mba, “Ikali balumbuluka, byonka Shenu wa Mwiulu byo alumbuluka.” Nanchi, kechi kujipo kikwabo kyakuuba ne, pakuuba twalengwa balumbuluka mu Kyeenyi kya Lesa.

<sup>82</sup> Pano, apo popaji kutaya kifulo kyetu. Inge twabula kutajisha, tukeseka kutula kunyuma ku byotwajinga. Kabiji kikulutu ke tutale kunyuma ku byo twajinga, Kitapisho kechi kiji na kilumbululo kwi atweba ne. Oo, kechi mwakonsha kwikimona ne, kipwilo? Amiwa kechi nakonsha. . . Amiwa kechi nakonsha kweseka yuwe mwingilo ne. Amiwa kuuba nauba ne, kabiji nangwa anweba kechi mwakonsha ne. Kechi kujipo kweseka ne. Anweba mwalubilamo, kyakutatwilapotu, kikulutu mubena kutala ku byo mwauba. Pakuuba kechi mwakonsha kutala ku byo mwauba ne.

<sup>83</sup> Talai byauble aja juba pa Kalvali kwi anweba. Jalipijile mutengo wenu. Japwishishe jipuzho. “Mambo enu nangwa achilatu ngee; akekalatu ke atoka nobe mabebe amashika. Kichila nobe kyachijisha; kitoka nobe booya.” Nanchi kechi muji na bubi ne. Anweba mwibalumbuluka babula bubi. Nangwatu mwauble byepi, nagwa mwakonsha kuuba byepi, muji babula bubi. Kikulutu anweba mwamwitaba Yesu Kilishitu nobe



Mupulushi wenu, mambo enu alekelwa. Kiji kyonse *kyalekelwa* nishi “alekelwa ne kulubako.”

<sup>84</sup> Nanchi kyuba byepi? Kikupa obewa, panyuma ya yewa musango, Mupashi Wanji, ku mulondela Aye, kabiji ne kuuba byonka byo aubile Aye, ku bakwabo babena kulondela. Aye wajingatu Muntu umo, Muntu walumbuluka. Aye wapaine bumi Bwanji, kabiji wapaine kyakumwenako kwi obewa. Pano twafwainwa kuuba byepi?

<sup>85</sup> Pano, kintu kitanshi kyo Nasaka kwamba, ke, Yesu kechi waikela bwikalo bwakwiikela Aye mwine ne. Bwanji bumi bwaikajijileko bakwabo. Akyo, kyalumbuluka, Bumi Bwapeenape. Inge waamba mba uya ku kipwilo, kabiji ke ube bintu byawama, akyo kyawama. Pakuuba inge waikela bumi bobbe palobe, obewa kechi uji na Bumi Bwapeenape ne. Bumi Bwapeenape, ke kwikela bakwenu. Kyashinikishiwe kimye kyo Kyaishile mu Mwanamukoko wa Lesa. Aye waikela, kabiji wajinga na Bumi Bwapeenape, mambo Aye kechi wiikajijile Aye mwine ne. Aye waikajijile bakwabo. Kabiji obewa utambula Bumi Bwapeenape, pa kutambula aja juba, kabiji kechi wakonsha kutwajijila na kwiikela obewa mwine ne. Obewa wiikela bakwenu.

<sup>86</sup> Muntu umo waambile mba, “Wakonsha kwimana byepi, kasa waleka muntu uji yense kukwita mazhina atama?” Obewa kechi wiikela obewa mwine ne. Obewa wikela bakwenu, pakuuba mba ukule awa muntu. Anweba mwaikala baana. Kabiji lukatazho ke luno, kipwilo kyalubamo amba bajinga baana. Obewa wimwana. Obewa ubena kutola mpuzha yakwa Kilishitu. Obewa wimwana, nanchi kechi kwiikela obewa mwine ne. Ikeela bumi bobbe bakwenu.

<sup>87</sup> “Kyawama, Mulongo Branham, Amiwa nakonsha kwikela *yuwe* mulongo, mambo kine aye ke muntu wawama.” Abyo kechi ibyo.

<sup>88</sup> Iikela yewa muntu wakushikwa. Iikela awa muntu wakonsha kukwipaya inge bakonsha. Abyo byobyoyo baubile kwi Aye. Abo Aye bamwipaile, kabiji Aye wafwile, amba Aye ebapulushu. Abo Bumi Bwapeenape. Inge, obewa, akyo kyaikala mu kyaji kyobe, obewa popo watalang’ana na Mwiulu. Bino waikala ke kitapisho kya bintu byobe, bipane, nobe mukoko byo apana boya bwanji. Obewa tala konka, konka ku Kalvali.

<sup>89</sup> Amiwa naketekela mba akye kikukwashe kufika pa kifulo. Abyo ibyo tabbanako, abyoyo bantu bonse byo bafwainwa kuba, kutuluka musango ye ujimo, kabiji ne kine kintu kyo waimenapo. Kipwilo, kechi kuya ku kipwilo na kwimba ne, kwimba nyimbo. Kipwilo ke kifulo kuji kololwa. “Buchibishi bwamambo bwatatwila ku nzubo yakwa Lesa.”

<sup>90</sup> “Atweba twafwainwa kwimona atweba bene amba twafwa, kabiji tuji na bumi mwi Kilishitu.” Nanchi, Aye walengele

jishinda ja kwi painamo bukitapisho atweba bene ku mwingilo Wanji, pakuuba mba Aye mu mulondele. Inge twamulondela Aye, twaikala bumi Aye boaikelepo. Akyo kyakila kuwama.

<sup>91</sup> Yesu waambile mba, kabiji wikyambile. Lekai amiwa ne mupepo byakwambula bicheche pa kikye. Telekeshai bulongo. Kechi kimupite ne akye. Yesu waambile mba, pa joja Juba Aye wa abenye bantu, nobe mikoko ne bambuzhi. Kabiji Aye waambijile bambuzhi, “Imana ku lubaji lwa kipiko.” Kabiji ku mikoko, “Imana ku lubaji lwa kilujo.”

<sup>92</sup> Kabiji Aye waambijile bambuzhi mba, “Fumai kwi Amiwa. Mambo, Amiwa najinga na zala, kabiji kechi mwapele kajo Amiwa ne. Amiwa najinga mukaleya, kabiji anweba kechi mwapepwile Amiwa ne. Amiwa najinga bwamba, kabiji anweba kechi mwapele Amiwa bya kuvwala ne. Amiwa najinga na kilaka, kabiji anweba kechi mwapele Amiwa byakutoma ne. Amiwa najinga wakolwa, kabiji anweba kechi mwapepwile Amiwa ne. Nanchi, fumai kwi Amiwa.”

<sup>93</sup> Kabiji ku mikoko, Aye waambile mba, “Amiwa najinga na zala, kabiji anweba mwapele Amiwa bya kuja. Amiwa najinga na bwamba, kabiji anweba mwapele Amiwa bya kuvwala. Amiwa najinga wakolwa, kabiji anweba mwapepwile Amiwa.”

<sup>94</sup> Kabiji monai. Kechi mukakalwe kutambula kikye ne, kipwilo. Lamai kikye mu muchima wenu, myaka ne myaka. Kyajinga kyaubiwe mu kubula kuyuka! Bantu kechi bekyuba mambo ye mwingilo wabo wakuba ne. Awa muntu ukupa kintu kikwabo, mambo wafwainwa kwikyuba, awa muntu ukupa kajo mambo aye wafwainwa kwi kyuba, aye uji na mulanguluko wa kwitemwa. Kyafwainwa bonka bumi bobbe, byonka byubilo byobe.

<sup>95</sup> Kyajinga bingi kyakumya ku mikoko, byo baambile mba, “Nkambo, kwepi Anweba komwajinga na zala? Kabiji kechi twimupele kajo Anweba ne... Kwepi Anweba ko mwajinga na zala, kabiji Anweba twimupele kajo? Kwepi Anweba ko mwajinga bwamba, kabiji Anweba twimupele bya kuvwala? Kwepi Anweba ko mwajinga na kilaka, kabiji atweba twimupele Anweba byakutoma? Kwepi ko mwajinga bakolwa Anweba, kabiji atweba twi mupepwile Anweba?”

<sup>96</sup> Kyajinga kintu kyakufuma mubutemwe, ke Bumi Bwenu bwaikela mwi mwiabo. Lesa, lekai bantu bamone Kalvali byo etubijile atweba, ponkapotu.

“Kwepi Anweba komwajinga, Nkambo? Atweba kechi twikiyukile ne.”

<sup>97</sup> Monai Yesu byo aalukile ne kwamba mba, “Monka mo mwaubijile ku babo, mwaubile kwi Amiwa.”

<sup>98</sup> Bumi bwakubula kwitemwa; kafwapo mulanguluko wabubiji ne. Ine kechi kwikilanguluka ne; pakuuba anweba

mwfawa bingi kubintu bya ino ntanda, kabiji ne kwikala na bumi mwi Kilishitu, kabiji nanchi ne kwendela mu mukwakwa wa mukatampe, amba abye bintu byubiwa ponkapotu. Anweba mwikyubatu. Kechi kwi kyamba ne, “Kyawama, pano, aye Nkambo wakonsha, Nkambo, wakeba amiwa mba ngube kyokyo.” Kechi kiji byobyoby ne. Anweba mwi lubaji Lwanji. Mupashi Wanji uji mwi anweba, kabiji muuba byonka byo abubilengapo Aye. Aa! Kitambulai.

<sup>99</sup> “Kuji jishinda jimweka bulongo ku muntu, pakuuba mpelo yajo ke jishinda jiya ku lufu.”

<sup>100</sup> “Kechi bonse baamba mba, ‘Nkambo, Nkambo,’ bakatwela ne, kana bonka boba kyaswa muchima wa Ba Taata,” kyafumatu mu michima yabo, kyatutu.

<sup>101</sup> Pano, aja juba pa Kalvali ja lipijile mutengo, pakuuba mba twikale muyewa musango.

<sup>102</sup> Kechi kwaamba mba, “Anweba mwayuka, kituzhi Jones kimye kimo wajinga . . . Aye wajinga wabujilwa malasha, kabiji Naile na kumupotela malasha. Amiwa ne mubula, Namwene mulongo umo wakabijilenga byakuvwala bya suti, kabiji Naile na kumupotela byakuvwala bya suti. Apeshe Lesa! Amiwa ne Mwinakilishitu.” Oo, ami! Obewa witemwa, muyaji, muntu kamulanda. Obewa wiikafutufutu.

<sup>103</sup> “Kechi wakonsha kuswisha kuboko kwa kilujo kuyuka bibena kubiwa ku kipiko, kabiji kwa kipiko kwayuka bibena kuuba kwa kilujo.” Nanchi ponkapotu wafwa mwi Kilishitu, poso wikyuba, nangwa byonkabyo. Ke kisemwa kyobe. Yo ndengele-yobe. Obewa wikyuba, nangwa byonkabyo. Ke Bumitu bwikala mwi obewa. Obewa wipana yesetu kuyewa Mupashi, kabiji Kikalatu Akyokine mwi obewa. Oo, obewa umvwa awa Mupashi wapeshiwa, abwa Bumi! “Kechi ke amiwa wikala ne,” byaambile Paulo, “bino Kilishitu wikala mwi amiwa,” nanchi byokijitu akyo kine.

<sup>104</sup> “Kyawama, Amiwa na kubuula, Mulongo Branham, atweba Twibenakilishitu kuno. Atweba tukwasha *babo* bantu. Atweba twibakwasha *aba* bantu.” Oo, ami! Buvu bwikale pa obewa. Abwa kechi Bwinakilishitu ne.

<sup>105</sup> Bwinakilishitu ke kintu kyubiwatu akyo kine. Kyafwainwa kubiwa. Kabiji anweba mwalubakotu, byonse pa kikyeye, “Amiwa kechi nakonsha ne.” Yanga, ke kyube.

<sup>106</sup> Kilishitu wapaine bumi Bwanji bonse kwi Lesa. Aye wipaine Aye mwine, nobe wa mwingilo, wa kwingijila bantu. Aye wapaine bumi Bwanji, kyatutu. Aye kechi wikyubile ne. Aye kechi wikyubile mambo akukajikizhiwa ne. Aye kechi waambile mba, “Pano, balongo, anweba mwafwainwa kulangulukangatu pe Amiwa, mambo Amiwa naishile na kwi mufwila anweba.”

Aye kechi waambilepo kyambo pa kikye ne. Aye wafwile, nangwa byonkabyo, mambo kyajinga Lesa mwi Aye.

<sup>107</sup> Ke Lesa mwi obewa, ke Lesa mwi amiwa, akyo kyokitulengela atweba kutala ku bakwabo. Mikoko, ku lubaji lumo.

<sup>108</sup> Umo mwiabo ukamba mba, “Kyawama, Nkambo, Amiwa naubile *kikye*. Kabiji, Nkambo, Amiwa naubile *kyokya*.”

<sup>109</sup> Aye waambile mba, “Fumai kwi Amiwa, anweba bakuba bibi. Amiwa kechi ne muyukilepo ne.”

<sup>110</sup> Inge kipwilo kyakonsha kufika kubyobyoby binshika, akyo kechi ke kintu kyo wafwainwa kweseka kuba ne, obewa mwine wingila kwikyuba. Ke kintu kyasemwa mwi obewa.

<sup>111</sup> Ndekeleko mambo, mulunda waki Pentekosito. Amiwa ne pentekosito. Pakuuba balunda bami baki Pentekosito bafika ku kifulo, kyo kyafwainwa kwikala ke—ke nyimbilo yavula yalubilo, kwimba maoma, nangwa kutota mapi, nangwa bisekeseke, pakuuba mba kwikale kuseka. Ayo ke ng’umvwinotu ya ku mubiji. Abo bamba mubipanyi bya kwimba kasa bakyangye kuya ku kondo. Batwezha bantu mu ng’umvino ya kando ya ku mubiji. Amiwa naketekela mu kwimba. Amiwa naketekela mu kutota maboko. Bino Naketekela mu bibye bintu. Akyo byokiji kine. Twafwainwa kwikala na kyokyo.

<sup>112</sup> Pakuuba anweba mwasha bintu bikatampe kechi byaubiwa ne, bushe abo bo bumi bwakwipana obewa mwine-bukitapisho bwakuuba mba Lesa wikala mwi obewa, ponkapotu ke kuuba kyokya kyawama mambo kijitu bulongo. Ke kutwajijilatu kuya kulutwe, kwakubula ne kulangulungulapo pa kikye. Ke kwikalatu. Pano talai, mwamona kibena kubiwa. Anweba mubatu. . . . anweba kechi muuba ne. . . . Anweba muji mujishinda ja jikatampe. Abyo byo byalumbulula Kalvali kwi obewa, uji mujishinda jikatampe, jakushikujijile obewa pajoja juba.

<sup>113</sup> Pano, pano vulukai, obewa kechi wafwainwa kwikala kichika mbuzhi kabiji kichika mukoko ne. Abo kechi bakonsha kumvwangakana ne.

<sup>114</sup> Pano, kuji bantu bavula bingi bamba mba, “Ee, mwayuka nyi? Tuji na kabungwe mu jibumba jetu. Atweba, tukwasha balanda. Atweba tuba *bibye*.” Akyo kijitu bulongo, bino obewa ubena kwinemba lunembo pa jisengo jobe pakikyeye. Kechi boba kyokyo ne.

<sup>115</sup> “Anweba panai bukwasho bwenu kumbaji,” Yesu byo aambile. Ke kyakwitatwilatu kine, kintu kimo kwi obewa, kijitu pamo nobe kuya, na kutapula meema akutoma. Obewa uji na kilaka. Inge muntu walondelapo uji na kilaka, anweba mulangulukaipo, ne aye. Kukabila kwa muntu walondelapo, anweba mulangulukaipo nobe byonka biji kukabila kobe. Kabiji

kechi mwakonsha kutako muchima ku kikye ne. Anweba twajijilaitu kuya kulutwe.

Bino, kechi wakonsha kwikala kichika mukoko kabiji kichika mbuzhi ne.

<sup>116</sup> Nanchi inge waamba mba, “Kyawama, kipwilo kyetu kiji na kabungwe. Atweba tupana ku bayanji, kabiji atweba tuba *kikye*, kabiji tuba *kyokya*, kabiji tuba *kikwabo*.”

<sup>117</sup> Inge uji nakyokya kwakubula kikwabo ne, Bumi bwa Kilishitu mwi obewa, obewa ubena kwikyubatu kyakine kyatutu. Yesu... Paulo waambile mba, Mutanshi Kolinda 13, “Nangwa Amiwa napana bya bunoshi bwami na kujisha bayaji, kabiji ne kupana mubiji wami amba bamusoke nobe kitapisho, kyafwako kyo nakonsha kumwenamo ne.”

<sup>118</sup> Bino, akye kyakosa, bino ke Bukine. Anweba mwafwainwa kufika ku kyokyo kinshika, yukai kimubijile Kalvali. Atweba turalapo pa kikye, ne kwamba mba, “Oo, ee, akyo kijitu bulongo.” Akyo kechi byokiji ne. Inge awa Mwaana wakwa Lesa waile ku Kalvali, na ku mumpopa, mwaana yense wiya wafwainwa kuya ku Kalvali. Aye wafwainwa kwikala na Kalvali. Obewa wafwainwa na joja juba ja pa Kalvali. Amiwa nafwainwa kwikala na joja juba ja pa Kalvali. Akyo kyapwisha jipuzho ja bubu. Kechi kwi imuna maboko na musapwishi; kechi kusukana mu kipwilo ne; kechi kwiyamo na kalata ne; kechi kwiyamo na kufunda mingilo ne. Kana kwiyamo na Kusemwa. Aye kechi wapaine kalata ne. Aye kechi wapaine kufunda mingilo ne. Aye wapaine Kusemwa. Abyo byo byo twiyamo. Nanchi, kufuma ku kyokyo, ponkapotu atweba tubena kwikala bwikalo bwa Bwinakilishitu.

<sup>119</sup> Pano, kintu kikwabo. Kichika mbuzhi, kichika mukoko, abo kechi baji na kyokyo kintu ne. Obewa wi mbuzhi nangwa mukoko. Anweba kechi mwi kichika mbuzhi nangwa kichika mukoko ne. Obewa wi mbuzhi nangwa mukoko.

<sup>120</sup> Pano, inge obewa ubena kubatu bintu byawama, kabiji ne kulaguluka mba katwela, kupichila mukyokyo, nanchi inge kechi kwajinga juba ja Kalvali ne. Mizhilo yabikileko kyokyo. Bino, byokiji kyasendele juba ja Kalvali, kyajinga kya kuletamo kyokyo, amba kechi twikaletu bamembala ba kipwilo ne, kana kwikala baana babalume ne babakazhi bakwa Lesa. Abyo byo byajinga aja juba ja Kalvali. Abyo byo kyalumbulwile kwi obewa, pakuuba mba wakonsha kuuba, kabiji ne kulondela, kabiji ne kuuba nobe Yesu.

<sup>121</sup> Bino, mukola kechi uya peulu ne kubwela panshi, pa kimye kimo ne. Mukola uyatu kutu kumo. Kabiji ne Mupashi wakwa Lesa uyatu kutu kumo. Kechi umvwanga bintu Nakyo. Uyatu kutu kumo.

122 Talai Yesu, mu kupezhako. Yesu waambile mba, “Mingilo yonguba Amiwa ne anweba mukeyuba, mambo Amiwa ngya ku Ba Taata.”

123 Amiwa kechi mbena kwamba bibye kyabaya-bingi ku kino kipwilo ne. Anweba mwaumvwa. Pakuuba aye Mbila yabikwa pa tepu. Biumbi bya makumi be beomvwa, mwaya ntanda.

124 Amiwa mbena kukumbula aja jipuzho jakwa kajimbuluzhi, pankapano. Amiwa kimye kyonse ng’amba mba. . . nabuulwa. Baamba mba, “Kika, kyo mwaketekela Baibolo? Yesu waambile mba, ‘Aye mingilo yo nguba Amiwa ne anweba mu keyuba, kabiji ne yakila pa iye mu keyuba, mambo Amiwa ngya ku Ba Taata.’”

125 Kyakonsha kwikala kyatama byepi, misita? Wakonsha kuya kwalepa byepi kufuma ku kyabupe kyakuyuka bapashi, na maana akuyuka bya masukuulu a mambo awama, na ndangulukilo yobe ya kintu kiji kyonse? Mulongo wami ne mulunda walubilamo, kechi wakonsha kuyuka mba awe Baibolo walondololwa na bumupashi?

126 Yesu wasachijile Bashaji amba Aye Wikifiile kubafunda, kabiji bajimuka, bamaana, kabiji bamilangwe, ne kwi Bisolola kubalukeke bakonsha kwiya ku Kalvali.

127 Pano monai. Yesu waambile. Monai Aye byo ekyambile. “Mingilo yonguba Amiwa,” Aye ubena kwiyuba pankapano. “Mingilo yonguba Amiwa pakino kimye, kubuka bakolwa, kubusha bafwa, kushikula meso abampofu, aye mingilo ne anweba mukeyuba. Anweba mukoba abye bintu inge mwaitabila mwi Amiwa. Anweba mukengila iye mingilo. Kabiji ne yakila mukuvula pa iye mukeyuba, mambo Amiwa ngya ku Ba Taata.”

128 “Pa kakimye kacheche, ne bapanopantanda kechi bakomona Amiwa jibiji, pakuuba anweba mukamona Amiwa. Amiwa nkekala nenu, ne mwi anweba, kufika ne kupelo ya natanda. Amiwa kechi nkemusha kwakubula kwasho ne. Amiwa kalomba Bataata; Abo bakemutumina Kwasho mukwabo, ao ye Mupashi Wazhila, ao, bapanopantanda kechi bakamutambulwila ne; nangwa byonkabyo, anweba Aye mukamutambulwila.”

129 Pano monai. Aya “yakila” mingilo, yajinga yakwikala na Bulume mu Kipwilo, kechi konka kubuka bakolwa mu milombelo ne, ne kupangamo ba diabola na milombelo, bino ne kupana Bumi Bwapeenape ku baitabila. Aye Mupashi Wazhila waishilenga, kabiji ne kupanwa mu maboko a Kipwilo, mu kupana Bumi. Oo! Abyo byo byalumbulula Kalvali. Kyasendele bantu bapanshi, banabalume ne banabakazhi babula munema, kabiji ne kwibasutwila pa kifulo, kyakwikala baana babalume ne babakazhi bakwa Lesa, bakubuka bakolwa kabiji ne kupana Bumi Bwapeenape; kupichila mukupana Mupashi Wazhila ku baitabila balukokelo, bantu kimye kimo bajinga babula lwitabilo, balengwa ke balwitabilo, kabiji ne kupana bya bumupashi, Bumi Bwapeenape.

130 Kiji kyakila byepi: Kwaamba mba, “Awe mwanamukazhi wakolwa walala papo, Nakonsha kulomba lulombelo lwa lwitabilo kabiji wakonsha kutambula lubuko,” akyo ke kintu kikatampe bingi, abyo byobyoy aubanga kyokya kimye; “bino,” waambile mba, “ne yakila pa iye mu keyuba; Amiwa nkemupa Bulume, kechi kumusangulatu pa kakimye kacheche ne, pakuuba kumupa Bumi Bwapeenape, abo bukekala Peenape, myaka ne myaka.”

131 Muyaji, mpofu, muntu kamulanda, mwakonsha kutupila kikye byepi? Kechi mwamona byo kiji kintu “kyakila” nyi? Akyo ke kintu kyakila bingi kyakonsha kumweka, kyajinga ke kupana Bumi Bwapeenape ku bantu. Bobuka Bumi Bwapeenape? Ke Bumi abwa Aye boyikajilepo, Bumi bwajinga mwi Aye, kupana Boobwa ku bakwenu. Bushe muntu wakonsha kuuba kyokya nyi? Mwaana wakwa Lesa wakonsha.

132 Yesu waambile mba, “Mwina bubi bo mwakonsha kulekela, kwi aye bwalekelwa; mwina bubi bo mwabula kulekela, kwi aye kechi bwalekelwa ne.”

133 Pano apo ipo kipwilo kya ba Katolika ne bakwabo bavula baubile bingi kilubo kikatampe. Baya nakwamba mba, “Amiwa na kulekela mambo obe.” Abyo kechi byo kyajinga ne.

134 Batambwile byepi lulekelo lwa mambo, mu Baibolo? Petelo wakumbwile jojo jipuzho, pa Juba ja Pentekositi. Baambile mba, “Tubye byepi pa kuuba mba tupuluke? Twakonsha kutambula byepi Akye kyo muji nakyo bonse?” Aye walondolwele bulongo. Aye wibabujile byakuuba.

135 Waambile mba, “Lapilai, anweba bonse, ne kutala kwi Lesa, kabiji ne kubatizhiwa mu Jizhina ja Yesu Kilishitu.” Na mambo aka? Lulekelo lwa mambo enu. Ayo yo “ikatampe” mingilo.

136 Baanga, anweba basapwishi lukeelo luno, baanga, anweba mubena kuteleka ku Kyambo kyami pa tepu ukwata byambo, benengezha kuya ku Kalvali lukeelo luno? Kabiji ne kutala bimubijile Lesa kokwa. Kabiji mushe ne mafujisho enu a dinominesheni, ne kusapwila Mamboawama. Alelula! Kiji mu lubaji lwenu pano. Musa kuba byepi Nakyo?

137 “Mambo lulapilo ne lulekelo lwa mambo lwafwainwa kusapwilwa mu Jizhina Janji, ku ntanda yonse, kutatwila ku Yelusalema.” Aleluya! Lukumo! Abyo byobyoy kiji.

138 Pano nga Kalvali walumbululaka kwi anweba? Ngaaja juba jakonsha kwi mubila ka? Bushe jimuyuzhizhemo, na sukuulu wa mamboawama? Bushe ji mulengejile kwikala jilaya ja yuzhiwamo nyi? Nangwa ji mulengejile kwikala Mwinakilishitu, wiipana nyi? Aleluya!

139 Bundengamambo, bwalekelwa! “Mingilo ikatampe yakila pa iye anweba mu keyuba.” Anweba mwamona “e’e” bobang’anyi,

kechi mwamona nenyi? “Yakila pa iye,” kulekela bubu, mu Jizhina ja Yesu Kilishitu.

<sup>140</sup> Pakuuba kupichila mu mafunjisho a kipwilo ne ma dinominesheni, kabiji ne bikwabotu, bimukashila ku kifulo, anweba mu kingijilatu ntanda. Mbulai muntu uji yense, mbulai mwanamukazhi uji yense, wakonsha kwiya ku Kalvali ne kweseka kwikala muntu umo mukatampe mambo muntu umo waambile kintu kimo. Mbulai kwepi komwakonsha kutala mu kilungi kya Kalvali, mu kyeya kyakyo kyaitabilwa, aja juba mu Kalvali. Mwakonsha kwikala byepi na juba jenu pa Kalvali, ne kufumako na jilaya jayula? Wakonsha kufumako byepi kasa uji wafuzhalululwa ku kabungwe, kabiji ne kusapwila mafunjisho-alengwa na bantu? Kika kyo kyabujila kukwalula wikepesha ku Kyambo kya Lesa? Inge wakonsha kuya kokwa, ukafumako wikepesha. Wakonsha kukeba byepi kwikala mukatampe mu kabungwe kobe, na jiyona ku kisocho kyobe, inge Yesu Kilishitu aye Mwaana wakwa Lesa wikepeshe Aye mwine ku mubiji wa-kutetaulwa, ku kilungi kyashipilwa mate, kufika ku buvu ne musebanya? Kabiji bamuvujile byakuvwala Byanji, ne kumupopa Aye, kumeso a ntanda yonse. “Kulengululwa na buvu.” Mwakonsha byepi kuya ku Kalvali ne kufumako na musango ungi wapusanako na Aye byo ajinga, walengululwa, wabuvu?

“Oo,” mwamba mba, “ba kapangamo.” Balekai bapang’ang’ane.

<sup>141</sup> Ikalai na juba jenu pa Kalvali, Lesa ukekala na jishinda Janji ne obewa. Lekai ne kyambe jibiji. Ikalai na juba jenu pa Kalvali, Lesa ukekala na juba Janji ne obewa.

Twayai tulombe.

<sup>142</sup> Nkambo, Anweba Lesa, tutwalai atweba bonse ku Kalvali ponkapano. Twayai tufume kwi atweba bene, Nkambo, mooyo wakuchina bantu, mooyo wakuchina muntu umo byo asakwamba. Kika, Aye ntanda yonse ya musekele, Aye bamuletejile bisela. Bino Aye wajinga wakokela, kufika ne kulufu. Aye wajinga wakokela, kufika ne ku mulengesha buvu. Aye wajinga wakokela, nangwatu mwaila kafulumende wantanda.

<sup>143</sup> Kabiji twavuluka mba kimye Satana kyo apumine kikote ino ntanda, aye waikela ke tangi kabiji wajinga na lusa pa inontanda. Aye washimwine kintu kimo kumeso a Nkambo, kabiji waambile mba, “Abwe bufumu bwami. Amiwa kengila nabo monka mo Nkebela.” Kabiji twavuluka mba, kufuma kujoja juba kufika ku jino, ino ntanda, iji mujifingo, yatangijilwa na umo yeka wiifingile.

Bino, Lesa, Anweba Lesa, twingijila Bufumu bwabula kufingwa.



<sup>144</sup> Lesa Taata, ke kintu kyawama bingi, abyo Anweba byo mwauba bintu bikatampe mu—mu kipikichala kya ntanda leelo. Kuswisha abye bipikichala bikatampe, nobe *Mizhilo Jikumi*, kabiji ne bikwabotu, byalupuka, kuswisha banabalume ne banabakazhi kumona, abo bakonsha nangwa kutwela pa kizhilo kya kipwilo ne, bino wibaswisha mba bamone byokiji. Lesa jishinda janji ke jishinda jasulwa, ku ntanda. Mambo atweba twauba nobe...Tuya mu Russia na kutangijilwa na komunizimu.

<sup>145</sup> Atweba tuji mu inontanda, bino kechi twi baino ntanda ne. Atweba twaya ku Kalvali. Atweba twikobeka atweba bene pa musalabu, na mambo a Bufumu bwakwa Lesa, kwikala ke umo Wanji. Nangwa ntanda yambe ka, atweba tuya mujishinda ja basulwa bacheche ba Nkambo. Atweba tubena kuya ku lusanguko, kabiji atweba twayuka mba akye kijitu pepipepi, Nkambo, poso kimye kyo tukasanguka kuya mu Bufumu abo bukaswana ino ntanda. Nobo Danyela byo ekimwene, kabiji kyaonawine ntanda yonse, kyaalukiletu ke mungu, kabiji mwela wibilewile nobe pa kipujilo kya kisalo. Bino, awa mutumba, Jibwe jakomene kwikala ke mutumba mukatampe wakumbene pantanda. Aja Jibwe jikeya. Anweba Lesa, twakeba kwikala kulubaji lwakyo. Twayai twikane atweba bene, twisendele musalabo wetu pajuba pajuba, kwikela Kilishitu, kwikela bantu bakwabo. Kiswishai kye, Nkambo.

<sup>146</sup> Kuji bamo muno lukeelo luno, abo babula kumuyuka Aye nobe Mupulushi, kabiji bakeba kwibavulukako mu milombelo ya kupezhako, kabiji mwakonsha kutemwa kikye kwikala ke juba jenu ja pa Kalvali, mwakonsha kusutulako maboko enu, ne kwamba mba, “Ndombelelaiko, Mulongo Branham. Amiwa nakeba kumuyuka Aye nobe Mupulushi wami.” Lesa akupeshe, mulunda mwanyike. Muntu mukwabo? Lesa akupeshe, mulongo wami kunyuma koko.

<sup>147</sup> Kwakonsha kwikalapo umo mukwabo nyi? Wakwamba mba, “Amiwa nakeba kumuyuka Aye. Amiwa nakeba aje kwikala ke juba ja pa Kalvali, kwi amiwa. Amiwa nakolwa ne kukooka. Ing’anyi mwingilo kwi amiwa kukaya na kintu kyonka kyo Nasemekejilwe mba ngube? Amiwa nasemekelwe, kusemwa kwikala ke mwaana wakwa Lesa, kabiji Amiwa njipano kasa nakwachijila kubintu bya muntanda. Lesa, ndekai amiwa pompwe leelo. Ndekai pompwe pa musalabo, leelo, amiwa mwine kabiji ne milanguluko yami, kuuba mba Amiwa ngikale pamo ne Kilishitu, kabiji ngikeele bakwetu. Nangwatu bangube kyamusangoka kwi amiwa, kundetela bisela, kabiji ne kumanyika, ne kwamba byonse byatama pe amiwa, ne bintu bikwabo, lekaitu amiwa ng’ende wikepesha kasangya kulutwe, kabiji ne bukimote, nobe mwanamukoko, nobe Aye byo aubile. Kabiji juba jimo, Aye walaile kusangula amiwa jibiji, pa Juba japelako. Amiwa mbena kupembelela joja Juba.” Kujipo akwabo

maboko akonsha kusutulwa peulu nyi? Lesa emupeshe anweba koko kunyuma, kabiji ne obewa. Kijitu bulongo. Bakwabo ba . . . Lesa emupeshe. Lesa emupeshe. Ne bakwabo, kasa tukyanye kulomba.

<sup>148</sup> Taata Wetu Wamwiulu, kyaambiwe mba, kimye Petelo kyo asapwijile pa Juba ja Pentekositi, “Bonse mobavujila baitabijile banungilweko ku Kipwilo.” Abo kine baitabijile na michima yabo yonse. Abo bantu bakusutula maboko abo, Amiwa naketekela mba baitabila na michima yabo yonse. Kabiji umvwe byo bauba, kuji jizhiba ja meema jibena kupembelela kuno. Babena kukeba abwa bubu bulekelwe. Kuji muntu umo wakonsha kwibatizha mu joja Jizhina, kabiji jojona Jizhina jijiko mushi ya Jiulu japewa ku bantu, amba tupulukilemo.

<sup>149</sup> Mambo, nobe byonka byo Najikwambula mu Kinembelo bimye bicheche byapitapo, amba, “Lulapilo ne lulekelo lwa mamba lwafwainwa kusapwilwa mu Jizhina Janji, ku ntanda yonse, kutatwila ku Yelusalema.” Kabiji ku Yelusalema, kimye lulapilo ne lulekelo lwa mambo po lwasapwijilwe, muntumwa wibambijile mu Binembelo, kabiji waambile mba bafwainwa “kulapila, patanshi, kabiji ne kubatizhiwa mu Jizhina ja Yesu Kilishitu.” Awa wajinga mwingilo wa musapwishi ye akonsha kuuba. Abo balapile, kabiji aye kwibatizha mu lulekelo lwa mambo abo. “Yense mwina mambo omwalekela, kwi aye alekelwa; Yense mwina mambo omwabula kulekela, kwi abo kechi alekelwa ne.”

<sup>150</sup> Taata, nga ntanda yaile byepi mungi nobe byonka byo bauba? Kika kyakubujila kwitabilatu Mamboawama apelatu? Kabiji abo baletamo, pa kyokyo, kupingakenyamo bintu bingi: mazhina abubela, lubatizhilo lwabubela, mbatizhilo ya Mupashi Wazhila yabubela, kupakana maboko na bamwingilo, kwingijisha bifulo bya Taata, Mwaana, Mupashi Wazhila, abyoyabula mu Binembelo; kyanembwa na bantu ba Kiloma, kechi ke lufunjisho lwa Bwinakilishitu lubula kutanwa kuji konse mu Baibolo ne. Lulekelo lwa mambo kechi lwa konsha kulekelwa kupichila mu bifulo ne, kanatu kupichila mu Jizhina ja Yesu Kilishitu.

<sup>151</sup> Bino, Taata, twayuka mba ke kintu kyabula kwitabilwa ku bantu bavula. Enu mashinda kimye kyonse ekala muyekawa musango. Pakuuba lekai banabalume ne banabakazhi, lukeelo luno, beye ku joja juba, aja juba pa Kalvali. Ako, Yesu, wasujilwe mu joja juba, abwa buvu, kuvulwa byakuvwala, kichibaulwa bipivwa bipivwa, kushipilwa mate, ne kwendelekwa; ku ntanda yonse, ku kipwilo, ne ku bantu bafwajilwe ku mutemwa Aye. Kabiji, nagwa byonnkabyo, mu byonse byo, Aye kechi waasamwine kanwa Kanji ne, kabiji waile na kufwila bonkaba bantu bamwendelekelenga Aye.

<sup>152</sup> Lesa, tutwalai ku Kalvali lukeelo luno. Kabiji umvwe baamba mba atweba kechi twi bantu batuntulu ne, baamba mba

twatwala Binembelo mungi, byonse byo bakeba kwamba, Lesa, kechi bakonsha kwimana mu Kyeenyi kya Lesa kabiji babwela ke bambe mba byaya mungi ne.

Abo kechi bakonsha kuvweta bubi bwabo kwingijisha Baibolo ne. Aye Baibolo uvwetula pa bubi bwabo: pa kubula lwitabilo kwabo; pakuuba mba bayukanyikwe; ke boobe nobe bakwabo bashala mu jibumba. Balekai beye ku Kalvali lukeelo luno.

<sup>153</sup> “Kabiji kutatwilatu ku Yelusalema; amba lulapilo ne lulekelo lwa mambo lwafwainwa kusapwilwa mu Jizhina Janji ku mikoka yonse ya bantu, kutatwila ku Yelusalema.”

Balekai basende tampulo imo yonka ya kwikobeka pa musalabu pakuuba mba bachibaulwe bipivwa bipivwa; kabiji ne kushipilwa mate; kabiji ne kwendelekwa; kabiji ne kutelwa misango yonse yakonshewa kutelwa mu ndonda ya bapopweshi baya mungi; babanya-po bipwilo; byonse byo bakeba kwita.

Lekai atweba, Nkambo, lukeelo luno, tutole jishinda jetu pamo na bacheche bakwa Nkambo basulwa. Lekai twende nobe byonka byaubile batumwa, kwalulukila ku kipiko nangwa ku kilujo ne, kabiji kufuma ku buwame bwa michima yetu twingijile Lesa. Kiswishai kye, Taata.

<sup>154</sup> Pano, bukai bakolwa ne bamanyikwa babena kwiya mu mulaini wakulombelelwa. Lekai babo basutula maboko abo, mu michima yabo, balapile, ponkapano. Lekai baimana kunyuma pa kimye kyabaya, bukiji bukiji bende kuya mu meema kabiji bekale na bubi bwabo bwalekelwa monka mu Jizhina ja Kitapisho, Yesu Kilishitu, aye Mwaana wa Lesa. Amena.

Ponka pa musalabu pafwijile Mupulushi wami,  
Pankutokesha ku bubi Nkonajinjijile;  
Konka ku muchima wami ko kwasumine  
Mashi;  
Lukumo ku Janji . . .

Lukumo ku Jizhina Janji!  
Oo, lukumo ku Jizhina Janji!  
Oo, konka ku muchima wami ko kwasumine  
Mashi;  
Lukumo ku Jizhina Janji!

Napuluka ku bubi konka lusa lwanji, (Byepi?)  
Yesu ku buwame bwanji waikala mwi amiwa,  
Konka ku musalabu Aye ko . . . (Nkonaikejile  
umo Wanji.) mu;  
Oo, lukumo ku Jizhina Janji!

Lukumo ku Jizhina Janji!  
Lukumo ku Jizhina Janji! (Jizhina Jawama.)  
Oo, konka . . . muchima ko kwasumine Mashi;  
Lukumo ku Janji . . .

155 Bushe akyo kechi kyaubapo kintu kimo kwi obewa nenyi? Kikuletela moyo. Kibika luketekelo mwi obewa: Bumi, Bumi Bwapeenape.

156 Kyokika “kupopwa pamo ne Kilishitu”? Ke kwikela bantu bekwenyu. Ng’anyi musango wabakwabo? Aba bakushikwa, aba babula kukutemwa, aba bakonsha ku kwendeleka: bekajilai bwikalo; ikalai nabo; batemwai; “lombelelai bonse bemwingijisha mujishinda jatama, ne kwamba misango yonse ya bintu byatama byabubela, namambotu a Jizhina Janji. Bamanyikile bangauzhi bajinga kunyuma yenu.”

157 Amiwa nakulanguluka mba mbila yakonsha kukwasha kipwilo lukeelo luno, kyakuuba mba mwakonsha kumona Kalvali, tubena kukebewa kupopwa.

158 Pano kika kyo yauba? Byonse byafwetwa kala. Nyenga mu kipona kya mawilo, ku bantu kuno bakolwa ne bamanyikwa: Byonse byafwetwa kala; kintu kyo mwakonsha kuuba ke kuketekela amba kyobe; kiswe mu jishinda jimo, kabiji usakutambula lubuko.

159 Vulukai: Pano kyo kika? Obewa wakonsha kuya ku ntanda, nakusapwila Mamboawama, kubuka bakolwa; kabiji ne kupana Bumi Bwapeenape.

Kyakonsha kwikala kyabaya byepi: kya, paji mwanamulume walala papo na—na kitumbwa tumbwa, kaasa, ne byonse byo biji. (Twamumona Aye javula bingi kasa apana mapesho Anji kabiji ne kubuka mwanamulume, kubuka mwanamukazhi; makumi biumbi bya biumbi bya makatazho ayukanyikwa mwaya ntanda, monai, kwibafumya pabilalo, pamakila; ke kivuletu kya bantu bajiwa nakaasa; leelo, baji bulongo, bantu babumi butuntulu.) “Aye mingilo yonguba Amiwa ne anweba mu keyuba; ne byakila pa bibye mukeyuba”: “byakila pa bibye,” kijitu bulongo.

Kika? Amiwa ne bapele bumi bwanungwako, monka mu Jizhina ja Yesu, kutwalako bumi bwabo palutwe mu moba kicheche.

Bino, “Ne byakila pa bibye mu keyuba: mukebapa Bumi Bwapeenape monka mu Jizhina Janji.” Yii!

160 Kika kyakuvwina buvu na Jizhina jakila mukuwama? Kika bantu kyo bakonsha kwi jisula kabiji ne kufumako kwi ajo? Ke diabola. Kyakine.

161 “Lulapilo ne lulekelo lwa mambo lwafwainwa kusapwilwa mu Jizhina Janji ku ntanda yonse, kutatwila ku Yelusalema.” Abyo Mbila byo yatatwile patanshi. Abyo ibyo nyi? “Lulapilo ne lulekelo lwa mambo lukasapwilwe mu Jizhina Janji, kutatwila ku Yelusalema.”

162 Pano, kitanshi, tusa kuuba byonka Aye byo aubile: kwikala na milombelo ya kubuka bakolwa.

<sup>163</sup> Kyalondelapo, tusa kwikala na bupe bukatampe bingi: Meema a nengezhiwa, kunyuma kukwe, ku yense ukeba ku batizhiwa (Kuji bya kuvwala kuno bya banabakazhi, bya kuvwala mumwe bya banabalume), bibena kupembelela anweba pakuuba mba mambo enu alekelwe; mambo vulukai, amba mwakonsha kwikalatu na bubi bwenu bwalekelwa kanatu monka mwaila lufunjisho lwa mu Baibolo. “Mambo kechi kujipo Jizhina jikwabo mushi ya Jiulu ajo japewa ku bantu ne, mo mwakonsha kupulukila.”

<sup>164</sup> Paulo wakumemye bamo bajinga ba batizhiwa kala. Kabiji babijikilenga, bajinga na lushijilo. Aye waambile mba, “Mwabatizhilwe munka?”

Abo baambile mba, “Lwakwa Yoano.”

Aye waambile mba, “Yoano wabatizhilenga mu lulapila.” Pano, umvwai kikye: mu lulapilo, kechi mu lulekelo lwa mambo ne. Baanga baumvwa kyokyo? Kechi mu lulekelo lwa mambo ne. Abo ba batizhilwe bulongo, mu lulapilo. Abo balapijile: “Ee, mwane, Amiwa nalapila. Amiwa, naketekela mba Aye ubena kwiya.” Abo babatizhilwe *mu lulapilo*; ko kwamba mba, “ku mwitabila Nkambo Yesu Kilishitu.”

<sup>165</sup> Pano byo baumvwine *bibye* (amba Kitapisho kyaiya kala), abo babatizhilwe jibiji, mu Jizhina ja Yesu Kilishitu. Kabiji pano, wapainwe kwi abo, byo ebabikile maboko, Mupashi Wazhila; kabiji baambile ne mujimi ne kwaula.

<sup>166</sup> Pano, mwakonsha kwalula byepi Kinembelo? Bikai munwe wenu pantu pamo mu Baibolo apo muntu umo po alekejilwe mambo anji, mu Lulayang’ano Lupya, kabiji ao wabatizhilwe mu jishinda jikwabo kanatu mu Jizhina ja Yesu Kilishitu.

<sup>167</sup> Mwashaiko pantu pamo mu Baibolo apo muntu umo po abatizhilwe mu Jizhina ja Taata, Mwaana, Mupashi Wazhila. Nangwa kuleta pa tebulu wami jishimikila, jishimikila ja kipwilo jibena kumwasha apo muntu umo po a batizhilwe mu Jizhina ja Taata, Mwaana, kabiji ne Mupashi Wazhila, poso myaka fili adulendi-ne-ikwabopo panyuma yakufwa mutumwa wapeleleko, kimye kipwilo kya Katolika po kya alwilwe ke kabungwe.

<sup>168</sup> Pano, Amiwa njina *Kunyuma-Yabashakulu Bakunikeya*, kabiji ba . . . bonse bamba mashimikila akala, kabiji ne bintu byonse, biji mwakubelengela mwami: akala keene, jishimikila jazhila ja pantanda; bishika byonka byabula kwaluka byo tuji nabyo.

<sup>169</sup> Tangai *Our Sunday Visitor*, nangwa katekizimu wa kipwilo kya Katolika, kabiji bamonai, byo bamba: “Bamo ba Mapolotesitati kape bakapuluka, mambo bafukamina ku lufunjisho lwa ba Katolika: Mambo Baibolo wabo waamba mba, ‘batizhai mu Jizhina ja Yesu Kilishitu,’ pakuuba twafumyapo

buzhile bwa 'Jizhina ja Yesu,' kabiji ne kubikapo 'Taata, Mwaana, Mupashi Wazhila,' kabiji ne abo bekiswa."

Pano, mweshai Kilembelo kyapusanako na kyokyo.

<sup>170</sup> Kabiji abyo byokiji. Kabiji nangwa byonkabyo, ntanda yafukamina ku kikye. Kika? Abo kechi bakiyapo ku Kalvali ne. Abo byokiji. Abo kechi bakimonapo ne.

<sup>171</sup> Abo bakemuletela bisela kabiji ne kwimwita...abo bakemutela mba, "Ubakyongo-kyazhila," "Yesu yekatu," kabiji ne onse mazhina a myendeleko obakonsha. Ng'anyi lupusano lujipo monse mo bemutelela? Kika abo...Aye wateeleko muchima pa byo Bamutelele? Aye wapopelwe pa musalabu. Aye waikajile Lesa, kabiji Lesa yeka. Kabiji umvwe awa Mupashi umo, wajinga mwi Aye, waikala mwi obewa, ukakulengela kuba kintu kimo: kasa aji na Jizhina Janji. "Kyonse kyo muuba" (byo byaamba Baibolo) "mu byambo nangwa mu byubilo, byubai byonse mu Jizhina ja Yesu, mu kupana lutotelo kwi Lesa."

<sup>172</sup> Kwepi ko mwikitana kyabasatu, lufunjisho lwa batushi? Kufuma mu katekizimu, kechi kufuma mu Baibolo ne. Kyambo kya "umo mubasatu" kechi kyangolwapo mu byonse Binembelo kufuma ku Ntendekelo kufika ne ku Lumwekesho. Kechi kujipo kintu kya musango yeo ne. Kechi kujipo kintu kya kuuba mba lesa wamubasatu ne. Ye Lesa, Lesa bunke bwanji, Lesa umo. Aye kimye kyonse waikalatu Lesa umo. Aye waingijile mu maofweshi asatu: Aye waingijile kimye kimo nobe Taata, mu kimye kya kwa Mosesa. ye waingijile jimo mu bumuntu, nobe Mwaana, Yesu. Aye wingila pakino kimye nobe Mupashi Wazhila. Bino ye Lesa umotu. Lesa Umo, kechi na mazhina asatu ne. Maofweshi asatu, bifulo bisatu mu Jizhina jimo: Yesu Kilishitu.

<sup>173</sup> Kintu kyonse kyapusanako ke butushi; kabiji Naipuzha muntu umo kumweshi kyokyo, inge kechi byo kiji ne. Abo ibyo. Amiwa naamba pa myaka kupitapo myaka kupitapo myaka, kabiji kafwako muntu nangwa umo wikisenda ne, nangwa byonkabyo (Mwamona?), mambo kechi kyakonsheka kwikala byo byo ne. Amiwa nji...muno mu Baibolo, patanshi; kabiji kuji mashimikila akala a kushinikisha kyokyo amba kine kiji bulongo. Kabiji kika diabola kyo...? Amiwa... Kyawama, Baibolo waambile mba bakekala muyewa musango: "Bakonsha kwiya pyepi, kana Amiwa ne bakoka?" Abo byo byonka byo Nayukapo pa kikye. Abo Yesu byo aambile, nanchi... .

<sup>174</sup> Amiwa kechi mbena kwamba kyokyo kuuba mba ngikale... . Inge Amiwa naamba kyokyo, kasa mbena kusapwila busapwishi bibye, Nakonsha kwikala kafutufutu wapeene panshi mukachi kenu. Abo ibyo. Amiwa naamba byo byo mambo Ke Bukine kabiji Bo Bumi. Mo bavujila babatizhilwe mwi Klishitu, bamvwala Kilishitu. Baji na Bumi, monka mu Jizhina Janji.

175 Twalomba mu Jizhina Janji, twakeba mu Jizhina Janji, kusapwila mu Jizhina Janji, kubatizha mu Jizhina Janji, kwikeela mu Jizhina Janji, kufwila mu Jizhina Janji, kuya Kwiulu mu Jizhina Janji, kusanguka mu Jizhina Janji. “Kisemi kyonse Mwiulu kyatelwa mba Yesu.” Aye Baibol byo byo aamba: “Kisemi kyonse pa ntanda kyatelwa mba Yesu.” Aye waambile mba, “Amiwa naishile mwi Ba . . .”

Anweba mwaamba mba, “Kyawama, ke Jizhina ja Taata.”

Taata kechi jizhina ne, ke kifulo. Aye waambile mba, “Amiwa naishile mu Jizhina ja Ba Taata, kabiji anweba kechi mwatambulwijile Amiwa ne.” Pano, ng’anyi Jizhina Aye jo aishijilemo? Uu-uu. Kyakine, “. . . kabiji anweba kechi mwatambulwijile Amiwa ne.”

176 Nanchi abyo byokiji; ke kintutu, ee, kyafyamika ku meso abamaana ne bajimuka. Kinetu, kine byokiji, uu-uu.

177 Kabiji mu Lumwekesho, nobe byo twafunjishe juba jikwabo: kuji kipwilo kya bupite kyakala, kiji ke kabungwe katanshi; kabiji wajinga na jibumba ja baana babakazhi abo basemelwe mwi aye. Abo booba kintu kimo, kyubilo kimo. Aye mpelo yanji ke Babilona, mu jishinda jimotu, na . . . na kipwilo kya ku Loma kabiji ke kupwizhiwa kwa kyapamo kwa bipwilo bya—bya muntanda; kabiji abyo byo byo aji, byonse ku kokakena, byonse mu kintu kimo, bwato bumo.

178 Pakuuba Kipwilo kya Lesa (Aleluya!), ke Kipwilo kya-baitwa, ba abanwa. Akyo Kipwilo kyashimikwa byepi? Mukeyiyuka byepi kye? Mwakonsha kuyuka byepi kikye amba kya Bukine? Inge Lesa wikisolola kwi obewa. Wayukile byepi—wayukile byepi Abela mba kyajinga mwanamukoko kechi maepozi ne? Kyamusolwejlwe aye: “Ko kulwitabilo Abela ko apajile kwi Lesa kitapisho kyawama.”

179 Byo aishilenga kufuma ku Mutumba Wakwalulwa, Yesu waambile mba, “Bantu baamba mba Amiwa yami ng’anyi?”

Bamo baambile mba, “Elaija,” “Mosesa,” kabiji ne bikwabotu.

Aye waambile mba, “Pano Mbena kwipuzha anweba, ‘Anweba mwamba mba Amiwa yami ng’anyi?’”

Petelo waambile mba, “Anweba mwi Kilishitu, Mwaana Lesa mumi.”

180 Aye waambile mba, “Anweba kechi mwafunjile kikye. . .” Mu musango mukwabo (Amiwa naamba kikye, kechi ku bakatampe ne, kana kwikajika kikomo kimo): “Anweba kechi mwafunjile kikye ku sukuulu ne; muntu umo kechi ye wimufunjishe kikye ne; kana Ba Taata, baji Mwiulu, bo be musolwela kikye: amba AMIWA (kechi ne Taata, Mwaana, ne Mupashi Wazhila ne, pakuuba, Amiwa ne Yesu Kilishitu). Kabiji pajije jibwe (Ng’anyi jibwe? Jonka jimo Abela joapichilemo;

pa jonka ja jibwe jimo.), pa jonkaje jibwe, Bukine bwadololwa bwa bumupashi bwa Lesa, Amiwa katunga Kipwilo Kyami, kabiji bizhilo bya kalunga kechi bikekishinda ne.” Abyo ibyo. Be kyeseke, bino kechi bakekishinda ne. Mwamona?

<sup>181</sup> Nanchi yangatu ku Kalvali, na kupopwa, ne kubwela, kabiji ne kutola jishinda jobe na bacheche bakwa Nkambo basulwa, yangatu kulutwe.

<sup>182</sup> Pano, Nkambo, twapana bitu byonse kwi Anweba. Amiwa kechi nayuka ne, kufuma mu jije jibumba, jiji muno. Amiwa kechi jipo na maana a kuyuka ne, Nkambo, kanatu Anweba mwi kisolola. Kabiji pano, Taata Lesa, Amiwa kechi mbena kwipuzha Anweba kuba kyokyo ne. Amiwa ne kibikatu mu maboko a bantu. Abyo byobaji. Lekai yuwe ekale mwine Kalvali lukeelo luno; lekai kikale kituntulu kya kupopapo kyaswa muchimawabumtu, kabiji ne kunkebelo-ya bumuntu, kabiji ne ku bintu bikatampe bya mu bumi.

<sup>183</sup> Lekai bantu bekale bekepesha, kabiji bekale bakusenda jishinda na bacheche basulwa bakwa Nkambo. Lekai bende na kwikepesha. Lekai basemwe mu bubwe Bufumu, abwe Bufumu bukatampe bwakwa Lesa, abo buji ke mubiji wa bumupashi, mubiji wa bumupashi wakwa Kilishitu pantanda: “Konka ku Mupashi umo atweba bonse ko kotwabatizhiwa ke mubiji umo.”

<sup>184</sup> Kiswishai kye, Nkambo. Nangwa bekale bafita, batoka, ba kibobo, bachiluluka, musango yense ye baikelamo, banabalume nangwa banabakazhi, bakaswa ne banababene: atweba bonse twatomeshiwako ku Mupashi-yeka umo.

<sup>185</sup> Kiswishai kye, Taata, kabiji lekai kikale na... mu bavula, lukeelo luno, pakuuba mba bakosha kukwatakanya; lekai Anweba mushikule kumvwa kwabo. Ipo, pojikekala nobe juba jipya kwi abo: juba jikasama, kabiji ne kyeya kicheche kya mafunjisho alengwa-nabantu afumepo, kabiji ne Kyeya kya Lesa kikasamina mujishinda jabo, ne kutabula kipembe akyo kimvweta akye Kyeya kyawama. Kabiji bakonsha kwenda mu jishinda jikatampe ja buzihile, nanchi, kwikela bantu bakwabo, nobe byaubile Kilishitu.

<sup>186</sup> Pano byo tubena kuleta yuwe mulaini wa milombelo, Nalomba mba Anweba musa kushinga bakalume Benu lukeelo luno, atweba bonse, kimye kyo tubena kulomba, umo pa mukwabo. Kabiji swishai, leelo, amba yense muntu wakolwa usa kwiya kupita mu uno mulaini ekale wabukwa. Lekai babwele, nobe yewa songwakazhi muheche wa meso-amvwetwapo, kabiji ne songwalume wa muheche, kabiji ne... kabiji ne yewa inetu mukulupe, ne—ne Mulongo Wright, kabiji ne bavula ba muboba baishile kupitamo, Nkambo, na byalumanamo ne misongo kabiji ne kyonse badokotala kyo bakakalwa kubuka; kabiji baji pano leelo (papitatu mulungu umo), kabiji abo baji pano, batuntulu, leelo.



<sup>187</sup> Lesa, lekai banabalume ne banabakazhi bapitemo na lwitabilo lumo, kasa bayuka mba babena kuya ku Kalvali na kupopwa ku milanguluko yabo ne maana abo ao akonsha “kubulwa kubuka.” Lekai bulume bwa sangwile Yesu kufuma mu kilende bwibape bumi, bumi bukatampe bwa bumi.

<sup>188</sup> Kabiji pano, kupwishatu bibye, lekai bavula beye ku kizhiba kya lubatizhilo. Twaipuzha, mu Jizhina ja Yesu. Amena.

<sup>189</sup> Pano, tujitu na mamineti tweti akupita mu mulaini wa milombelo kabiji ne mutanchi walubatizhilo. Bino kechi tuji na bitupa byamilombelo ne. Atweba twafuma ku kyokyo, kabiji tusa kweseka kwingijila mu mpwijilo yami ikatampe kimye kyo tukatatula. Amiwa ne mubuula anweba bonse, twibifumyapo, biji patepu, kabiji konse Amiwa ko nkaya, ao matepu akatangilapo.

<sup>190</sup> Kiyukilo kitongolatu ku jipesho. Mwine mulanguluko wajinga ke, “Inge walombelela bakolwa, ulengele bantu bakuketekele.”

Naambile mba, “Abo kechi bakaketekela ne.”

Aye waambile mba, “Obewa ukapewa bibye biyukile, kabiji kupichila mu bibye bakakuketekela.” Biyukilo byaenda kabiji byaenda, pa myaka jikumi kuzhokoloka ntanda yoonse, kwakubula nangwa kimye kimo ku kakalwa ne. Ku kakalwa ne, nangwa pacheche ne, mu kikye. Baanga bayuka mba akyo kyakine?

<sup>191</sup> Kyawama, inge wakonsha ku ketekela kiyukilo, apa bino waketekela ne Mbila. Abyo ibyo. Kibimweshu. Kabiji Lesa ukabika mwi amiwa Mbila (Kabiji ukaleke ikekale yalumbuluka byonkabya, bino kika. . . ) kabiji Amiwa ne mubuula mba kintu kimo kikekala kyabubela? Lesa kechi ukaswisha amiwa kuuba kyokyo ne. Ine, ine. Ine, mwane. Amiwa mbena kwimubuula kya Bukine.

<sup>192</sup> Pano, boonse babena kukeba kulombelelwa, nobe, kuyuwe mulaini, iyai kuno ku lulwe lubaji, inge mwakonsha, ako, tatamai ku kilujo. Kabiji nanchi akye kisa kulengela bantu kwiya kimye kyo tubena kulomba. Nanchi tusa kwambila ba—basongwalume, ne baasha kabiji abo basakumonga; kabiji byo basakwiyanga kuno, pano kululwe lubaji, tusa kwibaleta kupichila kunyuma, kabiji kwibaleta bapita monka. Muntu yense usa kulombelelwa.

<sup>193</sup> [Muntu umo waamba kwi Mulongo Branham—Waku.] Oo, ine, ine, Amiwa kechi naubile ne. Kyawama, kimye kyonse kyo mubena kukeba. Kechi kiji nalukatazho ne. Mwakonsha kumuleta kuno, nangwa anweba. . . Nakonsha. . . muletai kuno pakino kimye, nangwa palutwe kacheche, kimye kyonse kyoakonsha kukeba, kechi kiji nalukatazho ne.

<sup>194</sup> Pano, twayai tuzhindametu zoo, pa mamineti acheche abena kulondelapo. Nasaka mba anweba bonse mulangulukenga: Pano, kika kya—kika kyaamba Baibolo? “Mulombelo walwitabilo ukapulusha wakolwa.” Baanga bayuka mba abyo ibyo? Baanga bayuka mba Baibolo byobyo aamba, “Abye biyukilo bikebalondelanga baitabila. Mingilo yo nguba Amiwa ne abo bakeyuba”? Kabiji mingilo yajinga ika? Aye waambile mba, “Nakonsha kuuba inge anweba mwaketekela mba Amiwa nakonsha kuuba kikye.” Abo ibyo nyi?

Jipuzho jami jajinga mbaka? “Abo kechi bakaketekela ne.”

Aye waambile mba, “Abye biyukilo bikebalengela kwitabila.”

<sup>195</sup> Pano, inge waketekela, inengezhai: Akye ke kimye kyenu kya kupokololwa. Kijitu pamo byonka byo kyakonsha kwikala kufuma kububi, ke mulayetu umo wa Lesa umo.

<sup>196</sup> Pano, tuji na mucheche, mwanamukazhi muno, uji na lukatazho lwa munda, kufuma ku New Albany. Tusa kumulombelela, patanshi, pakuuba mba amone—amone kipona. Pano, kasa twazhindama, kabiji muntu yense, pano. Amiwa nakeba balongo kukwasha, kuno. Kabiji twayai tukunyike mitwe yetu, ponkapano, tulombe.

<sup>197</sup> Pano, Taata Wamwiulu, akye ke Kyambo kyenu. Amiwa kechi jipo na mwingilo wakumona mo basakubila na kikye ne, bino Amiwa mwingilo wami ke wakusapwilatu. Kabiji pakuyuka kikye (kabiji pakuyuka mba Amiwa ne muntu uji na myaka-yapakachi pakino kimye, kabiji juba jimo jika kunkumanya Obewa): Amiwa nasapwila Bukine kufuma mu muchima wami. Anweba mwi kiyuka. Kechi kulangulukila jimo ne, inge kyajinga byobyo, Nkambo, nishi Nakebewa kulapila.

<sup>198</sup> Kabiji Taata, Nalomba mba Anweba musa kukwasha, pano, byo tubena kutwela mu kulombelela bakolwa, lekai milombelo yami ikumbulwe, kechi milombelo yami yonka ne, Nkambo, kana milombelo ya kino kipwilo, nobe baabo bantu bakumulanda... Pano ibyepi inge awe wajinga mukazhami waimana papo? Pano ibyepi inge yuwe wajinga iye, waikala mu kipona kyamawilo? Nangwa nyenga yami? Ba maama? Oo, Lesa, bukai babo bantu. Musa kwikyuba Anweba nyi, Nkambo?

<sup>199</sup> Talai, baimana mu mulaini wamilombelo: lukatazho lwa muchima, kaasa, bitumbwatumbwa, misango yonse ya bikola ne bya lumanamo. Bavula babena kwiya (maadulendi babena kupokololwa, konka kunotu, Nkambo), kabiji babena kwikimona, kabiji ne kwikitabila, kabiji babena kwiya mu mulaini wamilombelo na kutambulwila lwabo. Babena kwiya ku Jibwe jumi pakino kimye, kechi kwi kalume Wenu ne, pakuuba kwi Mwaana Wenu, Yesu, Ao uji Tangi wa Kipwilo, wa bumupashi, Muntu ubula kumweka pakachi ketu. Kabiji byo tubena kuya, na kupana Jizhina Janji (Anweba mwaambile

mba, “Mu Jizhina Jami bakapangilamo bademona.”), Nalomba namba Anweba musa kukumbula milombelo yetu, mu Jizhina ja Yesu. Amena.

<sup>200</sup> Pano, muntu yense ekale mu milombelo. Bino, aye ke lubaji lwenu, ne anweba. Awe ke mulombelo wenu.

Bino awe mwanamukazhi mucheche usa kufwa, inge Kintu kimo kechi kyakonsha kumukwasha ne.

<sup>201</sup> Baanga bayuka Mulongo Stadskev? Mulongo ne Nyenga Standskev? Amiwa bangijichile kufuma ku Germany jinga jisatu bufuku bumo; mwaanabo wamucheche wafwile. Baipwizhe, “Mulongo Branham, twakumona, kupichila mu Mupashi wa Lesa, wasangula bafwa,” (Baimene kasa baji ponka na kwikimona. Mwamona?) “kabiji twayuka mba obewa wi ngauzhi wakwa Nkambo. Aambatu Kyambo.”

Amiwa naambile mba, “Amiwa kechi nakonsha kwi kyamba ne, kanatu kyabikwa mukanwa kami.”

“Iya ku Germany.” Nabukile bukiji bukiji. Kabiji batumine foni: “Twela mu ndeke ya jeti yakonsha ku kuleta ku Germany mu maawala sikisi.” Jeti wa mazhita ao wakonsha kutwala ku Germany na kusangula mwaana wafwa. Jeti wa mazhita wakonsha kutwala mu maawala sikisi, kufuma ku Louisville kuya ku Munchen, Germany.

<sup>202</sup> Amiwa naile monka, ne kufukama pa manungo ami, kabiji Naambile mba, “Taata, kika kyo Nakonsha kuuba? Ambai mu kanwa kami.” Aye kechi wakumbwile ne. Naile mu binchi, Naambile mba, “Taata, kika kyo Nakonsh kwamba? Bikai byambo mu kanwa kami. Nakonsha kuya kyatutu, inge ne.” Amiwa na bwelele, Aye kechi wakumbwile ne. Naishile natwela mukachi. Bufuku bonse Nalombelengatu, “Nkambo, bikai byambo mu kanwa kami.” Kafwako kyakumbwile ne.

<sup>203</sup> Lukeelo lwalondelapo bakazhi bami babukile. Ponkapotu byo abukile, Kyambo (Naimene), Aye waambile mba, “Kechi ukajipile kikye ne. Akye ke kuboko kwa Nkambo.” Uu-uu.

Ponkapotu naile ku foni: “Amiwa kechi nakonsha kwiya ne. Ine, akye ke kuboko kwa Nkambo. Amiwa bakanya.” Mwamona bulume buji mu kukajipila? Kimye Lesa kyo aambile mba, “Kechi wikyube ne, mambo ke kuboko kwa Nkambo.”

<sup>204</sup> Pano, Mosesa, kimye kimo, wabujilwe mba kechi obepo kintu kimo ne, waile na kwikyuba nangwa byonkabyo. Anweba mwavuluka nyi? Nanchi Amiwa—Amiwa kechi naile ne.

<sup>205</sup> Kabiji Amiwa nakonsha kuleta byanembwa mu kumwasha bantu baanga bana, kuuba mba, batongolwa kuba madokotala mba bafwa, panyuma ya kulomba kabiji ne kukajipila lufu. Mwamona? Atweba twimana na kukajipila kyokya kintu. Kabiji umvwe Lesa wakupele bulume bwakuubapo kintu kimo, wafwainwa kwikala watekanya na byo ubena kuuba. Mwamona?

Obewa wafwainwa watekan-...Aye waambile mba, “Kechi ube ne...”

<sup>206</sup> Pano, vulukai, akyo kechi kuwama kwi anweba pakatampe ne, pakuuba kwi amiwa, kyalumbulwilepo kintu kimo. Mwamona?

“Kechi ukajipile kikye ne.” Jawama bingi, Jiwi ja lusa (pepi nobe sikisi-sate, Naketekela byo kyajinga, sikisi-sate alwa lukeelo) jaambile mba, “Kechi ukajipile kikye ne. Akye ke kuboko kwa Nkambo.”

Naambile mba, “Nemusachila, Taata. Nemusachila, Nkambo. Amiwa kechi nsakwikyuba ne.”

<sup>207</sup> Inge Aye waambile mba, “Kikajipile kye. Awe ke mulwanyi watwelamo.”

Nakonsha kwamba mba, “Twayai tuyenga.” Kabiji umvwe kyaubiwe.

<sup>208</sup> Kimye awa songwalume wamuचेचे kokwa ku Finland walajile popa, kasa wafwa, ba mupuka, kechi mwajingapo ne kikupa kyawama mu mubiji wanji ne, Nkambo waambile mba akwa ke kuboko kwa Satana, amba, “Kikajipile.”

<sup>209</sup> Kabiji Naambile mba, “Lufu, kechi wakonsha kumukwachijila ne. Mu bwezhe, mulekeleko.” Ponkapa, waimene ku maulu anji, na butuntulu, kechi mwajingapo nangwa kikupa kyamokoka mu mubiji wanji ne. Akyo kyo Kyambo kya Nkambo. Amiwa kuuba naingijisha Kyambo kya Nkambo ne poso Kyambo kya Nkambo kyaiya kwi amiwa.

<sup>210</sup> Pakuuba mu Kinembelo, Kyambo kya Nkambo kyaapa mwingilo wakulombelela bantu bakolwa; kyakupa mwingilo wakwibalombelela. Pano, “milombelo ya lwitabilo ikapulusha wakolwa;” twayai tulombe, kunyikai mitwe yenu; tusakumona Aye byoaamba, kimye kyo mubena kupita.

<sup>211</sup> Obewa wi Mwinakilishitu, byo uji nyi? Obewa waketekela na muchima onse yense amba Yesu usa ku kulengela kwikala bulongo? Uji nalukatazho lucheche lwa munda; wamanama nakyo pa myaka yavula, nyenga. Pano, usa kwikalatu bulongo, inge wakonsha kuketekela.

<sup>212</sup> Pano, Nkambo Lesa, awe mwanyike mwanamukazhi usa kufwa kanatu Anweba mu mukwashe. Pano Amiwa nalomba, byo Mbena kumutala, Amiwa kechi namonapo eene mambo akufwila ne.

Kabiji Amiwa naumvwa mu mupashi wami, Nkambo, amba kyokyo kwaswa Anweba, pano, kuuba mba Nakajipila kikye: Satana, mulekeleko!

Mu Jizhina ja Yesu Kilishitu, ekale bulongo, waiya ku kino kipwilo, ne kupana lushimuno ku lukumo lwa Lesa. Amena.

213 Pano, byo kyapeelatu nobe kikye, inetu, usakwikalatu bulongo. Bushe waketekela kyokyo mulongo nyi?

Bushe mwaketekela anweba papo, amba musa kwikalatu bulongo? Yanga pano, utatule kuja byonse byo...byo usaka nanchi, wikale bulongo.

Pano, waketekelwa kupana ku ntanda kalepu, kabiji usa kwiyilengela kubula kwingila; yakupele kalepu, ne kukulengela kubula kwingila. Pano, aye Lesa wa Mwiulu awa ufumyapo kalepu Kanji pa ntanda mu kupana lulekelo lwa mambo, monka mu Jizhina jimo, wakonsha kukupa lulekelo lwa mambo, ne kufumyapo kalepu pe obewa, kabiji ne kukulengela kwikalatu bulongo.

Ketekelai amba Aye wakonsha kulengela awa muchima kumpema bulongo? Mwauba kyokyo, usa kwikalatu bulongo...?...

214 Nkambo Yesu, awe mwanamukazhi kamulanda wafwainwa kwikala mukikye kipona bumi bwanji bonse kabiji pano, fumamo. Pakuuba atweba tubena kwipuzha mba abwe bulume bwa Satana bufumishiwepo pe aye. Lekai ekale na bumi kabiji ne kwenda kasa ajitu bulongo byonka byo ajinga kala. Twikipuzha mu Jizhina ja Yesu. Amena.

215 Obewa waketekela nyi? Ke mwingilo wapwa kala, kyaubiwa. Lukatazho lweepi? Kwakubula moyo, kwakubula...Kechi byokyajinga...? Obewa wabukilwe na kaasa pa kimye kimotu...?...Kasuluka, paana bintu byonse kwi Yesu.

216 Nkambo Yesu, Nabika kuboko kwami pa yuwe mwanamukazhi ne kukajipila misango yanji. Amiwa nayuka mba Mwinakilishitu, wasemwa ku Mupashi. Amiwa ne kifumyapo pe aye, mu Jizhina ja Yesu Kilishitu Jizhina jawama. Amena.

217 Nkambo Lesa, namambo mulongo wanji wawama, Naipuzha lupulukilo lwanji mu Jizhina ja Yesu. Imanatu pa kyokyo. Amena. Kikobiwa.

218 Winengezha kutambula lubuko lobe, mwana? Kyawama, kyaya ku kuboko Kwanji.

219 Nkambo Yesu, payuwe mwanamulume mwan'yike, waamba mba, kufuma kwi Anweba, walomba mukutambulwila lubuko lwanji. Noba kalume Wenu, Nabika maboko ami pe aye mu Jizhina ja Yesu Kilishitu...?...Amena.

Pano, ujitu yense...?...pano, itaitu pa Jizhina Janji. Pano, kechi—kechi kwi amiwa ne...?...

220 Taata Lesa, nobe yenka mwaana umo ao kimye kimo washakamijile pa kyaji kya bainanji, aye wamupapasha kabiji—kabiji ne kulomba nanji ne kukwata kuboko kwanji kwa kucheche kimye kyo ajinga lukeke. Pano, Satana wamubikile mu kifulo mubikwa balubakana milanguluko. Lesa, aye waiya

ku Kipwilo kyazhila kya Lesa mumi, Kipwilo kyasemekwa na Mupashi wakwa Lesa, Kipwilo akyo Mupashi wakwa Lesa mo ekala, kabiji ne kwilengela Aye mwine kuyukanyikwa. Kabiji leelo, monka mu milombelo, twapokolola yuwe mwanamukazhi kufuma mu kikye kifulo. Mu Jizhina ja Yesu Kilishitu, twalomba. Amena.

Yanga ku muzhi, ujitu bulongo.

Nakusachila pa kwiya, na kwipuzhizha bainobe; awa ke mwaana wakine.

<sup>221</sup> Aje ke juba jobe ja bupokolweshi. Nkambo Yesu, pa yuwe mwanamukazhi mwanike, pa lupulukilo lwa balume banji kabiji ne pa bupokolweshi bwa pashingo panji, lekai aye ekitambule mu Jizhina ja Yesu Kilishitu, Iye waamba mba “Iya, ne kwikiketekela ponkapano,” kabiji ke mwingilo wapwilatu jimo.

<sup>222</sup> Nkambo, badokotala baamba mba, Nkambo, kiji mu mubiji wanji, kasa kiya mu jiso janji. Aye waiya na kupokololwa, ponkapo pa kitapisho, kino Kipwilo kyazhila kasa kibena kulomba, Amiwa naipuzha bupokolweshi bwanji mu Jizhina ja Yesu Kilishitu, alwe lukatazho lusakufuma pa mubiji wanji. Ke mwingilo wapwila jimo.

Namambo a mwanaji, Napesha kako katambala. Lekai kumvwa kabiji ne butuntulu bwalumbuluka bubwele ku kutwi kwanji...?...

<sup>223</sup> Pano Kipwilo ke kyambe; pano Kipwilo ke Mubiji wa Kilishitu ubula kumweka. Atweba bonse tubena kukulombelela. Mwamona? Atweba kechi—atweba kechi twamba mba tuji muntanda ne. Atweba kechi tubena kwamba pa kuwayawaya ko tubena kuya ne. Atweba twatana Jishinda. Atweba twasemekelwe mu joja Jishinda. Twi Kipwilo kya Lesa Mumi (lubaji lwakyo); mambo, kypalang’ena mwaya ntanda. Pakuuba aje jibumba jabo. Leelo, twaiya pamo mu Jizhina Janji. Twaiya na kuuba Aye kyo aambile mba, ubai. Abya Aye byo akonsha kubula kusolola umvwe twaiya pamo. Kulombelela bakolwa, kubika maboko pe abo, “lulombelo lwa lwitabilo lukapulusha bakolwa.”

<sup>224</sup> Lekai lukatazho lobe lwa muchima lufume pe obewa. Mu Jizhina ja Yesu Kilishitu, Amiwa nakokela mwingilo Lesa ye ampele...?...



*AJA JUBA PA KALVALI* KDE60-0925  
(That Day On Calvary)

Ino Mbila na Mulongo William Marrion Branham, yalupwilwe patanshi mu Kizungu Pamulungu lukeelo, Kainyainya 25, 1960, pa Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2021 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)